

欽定舊五代

卷四
之十

舊五代史卷四

宋門下侍郎參知政事監修國史薛居正等撰

梁書第四

太祖紀四

開平二年正月癸酉帝御金祥殿受宰臣文武百官及諸藩屏陪臣稱賀諸道貢舉一百五十七人見于崇元門封從子友寧爲安王友倫爲密王幽州劉守文進海東鷹鷲蕃馬氈罽方物自去冬少雪春深農事方興久無時雨兼慮有災疾帝深軫下民二月命庶官遍祀羣望掩瘞暴露令近鎮案古法以禳祈旬日乃雨

陰帝以上黨未收因議撫巡便往西都赴郊禋之禮乃

下命曉告中外取三月一日離東京以宰臣韓建權判

建昌宮事

五代會要十月以尚書兵部侍郎李皎爲建昌宮副使

兵部侍郎姚洎

爲鹵簿使開封尹博王友文爲東都畱守辛未契丹主

安巴堅遣使貢良馬三月壬申帝親統六軍巡幸澤潞

是日寅時車駕西幸宰臣并要切司局皆扈從晚次中

牟下詔以去年六月後昭義行營陣歿都將吏卒死于

王事追念忠赤乃錄其名氏各下本軍令給養妻孥三

年內官給糧賜丁丑幸澤州辛巳以同州節度使劉知

俊爲潞州行營招討使壬午宴扈駕羣臣并勞知俊賜

以金帶戰袍寶劍茶藥甲申登東北隅迨遙樓蒐閱騎
乘旌甲滿野丙申招討使劉知俊上章請車駕還東京
蓋小郡湫隘非久駐蹕之所達覽帝俞其請以鴻臚卿
李崧唐室宗屬封萊國公爲二王後有司奏萊國公李
崧合畱三廟于西都選地位建立廟宇以備四仲祀祭
命度支供給以遵彝典四月以吏部侍郎于兢爲中書
侍郎平章事以翰林奉旨學士張策爲刑部侍郎平章
事時帝在澤州拜二相于行在丙午車駕離澤州丁未
駐蹕于懷州宴宰臣文武百官辛亥至鄭州壬子至東
京丙寅車駕幸繁臺觀稼鄴陵居人程震以兩歧麥穗

并畫圖來進甲寅淮寇侵軼潭岳邊境欲援朗州以戰
艦百餘艘揚帆西上泊鼎口湖南馬殷遣水軍都將黃
瑀率樓船遮擊之賊衆沿流宵遁追至鹿角鎮詔以戶
部尚書致仕裴迪復爲右僕射迪敏事慎言達吏治明
籌算帝初建節旌于夷門迪一謁見如故知乃辟爲從
事自是之後歷三十年委四鎮租賦兵籍帑廩官吏獄
訟賞罰經費運漕事無巨細皆得專之帝每出師卽知
軍州事逮于二紀不出梁之閩閩甚有裨贊之道禪代
之歲命爲太常卿屬年已耆耄視聽昏塞不任朝謁遂
請老許之暮月復起師長庶官焉五月丁丑王師圍潞

州將及二年李進通危在旦夕不俟攻擊當自降太原
李存勗以厚幣誘結北蕃諸部竝其境內丁壯悉驅南
征決戰以救上黨之急部落帳族馳馬勵兵數路齊進
于銅鞮樹寨旗壘相望王師敗于潞州己丑令下諸州
去年有蝗蟲下子處蓋前冬無雪今春亢陽致爲災沴
實傷壠畝必慮今秋重困稼穡自知多在荒陂榛蕪之
內所在長吏各須分配地界精加翦撲以絕根本壬辰
夜火星犯月太史奏災合在荆楚乃令設武備寬刑罰
恤人禁暴以禳之軍前行營都將康懷英孫海金已下
主將四十三人于右銀臺門進狀待罪帝以去年發軍

之日不利有違兵法並釋放兼各賜分物酒食勞問制
義昌軍節度使劉守文加中書令封大彭王盧龍軍節
度使劉守光封河間郡王許州節度使馮行襲封長樂
王是月癸未淮賊寇荊州石首縣襄陽舉舟師沿滬港
襲敗之六月辛亥以亢陽慮時政之闕乃詔曰邇者下
民喪禮法吏舞文銓衡既失于選求州鎮又無其舉刺
風俗未厚獄訟實繁職此之由上遭天譴至是決遣囚
徒及戒勵中外丙寅月犯角宿帝以其分野在兗州乃
令長吏治戎事設武備省獄訟恤疲病祈福禳災以順
天戒丙辰邠岐來寇雍西編戶困于逃避且芟害禾稼

結營自固踰月同州劉知俊領所部兵擊退襲至幕谷
大破之俘斬千計收其器甲宋文通僅以身免詔曰敦
尚儉素抑有前聞斥去浮華期臻至理如聞近日貢奉
競務奢淫或奇巧蕩心或雕鑄溢目徒殫資用有費工
庸此後應諸道進獻不得以金寶裝飾戈甲劍戟至于
鞍勒不用塗金及雕刻龍鳳如有此色所司不得引進
邕州奏鑊鄣山僧法通道璘有道行各賜紫衣是月壬
戌岳州爲淮賊所據帝以此郡五嶺三湘水陸會合之
地委輸商賈靡不由斯遂令荆湘湖南北舉舟師同力
致討王師旣集淮夷毀壁焚郭而遁秋七月甲戌大霖

雨陂澤泛溢頗傷稼穡帝幸右天武軍河亭觀水幸高
僧臺閱禁衛六軍詔曰車服以庸古之制也貴賤無別
罪莫大焉應內外將相許以銀飾鞍勒其刺史都將內

諸司使以降祇取用銅糞定尊卑永爲條制仍令執法

官糾察之

五代會要載七月敕曰祭祀之儀有國大事如聞官吏慢于恪恭牲具禮容有異精審宜

令御史臺疏其條件奏聞

癸巳以禪代已來思求賢哲乃下令搜訪

牢籠之期以好爵待以優榮各隨其材咸使登用宜令

所在長吏切加搜訪每得其人則疏姓名以聞如在

下位不能自振者有司薦導之如任使後顯立功勞別加

遷陟敕禁屠宰兩月甲午以高明門外繁臺爲講武臺

是臺西漢梁孝王之時嘗按歌閱樂于此當時因名曰
吹臺其後有繁氏居于其側里人乃以姓呼之時代綿
寢雖官吏亦從俗焉帝每登眺蒐乘訓戎宰臣以是事
奏而名之八月辛亥敕應有暴露骸骨各委差人埋瘞
兩浙錢鏐奏請重鑄換諸州新印詔禁戢諸軍節級兵
士及供奉官受旨殿直以下各修禮敬甲寅太史奏壽
星見于南方兩浙錢鏐奏改管內紫極宮爲真聖觀改
臨安縣廣義鄉爲衣錦鄉十國春秋吳越世家八月梁
救封唐山縣爲吳昌縣唐興
縣爲天台縣又救升杭越等州爲大都督府復改新甲
城縣曰新登長城縣曰長興樂成曰樂清避梁諱也
子夜東方有大流星光明燭地有聲如裂帛唐州上言

白龍見圖形以進九月丙子太原軍出陰地關南牧寇掠郡縣晉絳有備帝慮諸將翫寇乃下詔親議巡幸命有司備行丁丑翠華西狩宰臣翰林學士崇政院使金吾仗及諸司要切官皆扈從餘文武百官並在東京壬午達洛陽帝御文思殿受朝參許汝孟懷牧守來朝澤州刺史劉重霸面陳破敵之策癸未西幸宿新安丙戌至陝州駐蒲雍同華牧守皆進鎧甲騎馬戈戟食味方物幽州都將康君紹等十人自蕃賊寨內來投又幽州騎將高彥章八十人騎先在并州乃于晉州軍前來降至是到行在皆賜分物衣服放歸本道以示懷服丁亥

至陳州賜宴扈從官戊子延州賊軍寇上平關又太原
軍攻平陽烽火羽書晝夜繼至乙丑六軍統軍牛存節
黃文靖各領所部將士赴行在甲午太原步騎數萬攻
逼晉絳踰旬不克知大軍至乃自焚其寨至夕而遁福
州貢玳瑁琉璃犀象器并珍玩香藥奇品海味色類良
多價累千萬十月己亥上在陝兩浙節度使奏于常州
東州鎮殺淮賊萬餘人獲戰船一百二隻以行營左廂
步軍指揮使賀瓌爲左龍虎統軍以左天武軍夾馬指
揮使尹皓爲輝州刺史以右天武都頭韓瑋爲神捷指
揮使左天武第二都頭胡賞爲右神捷指揮使仍賜帛

有差以解晉州圍之功也以尹皓部下五百人爲神捷
軍乙巳御內殿宴宰臣扈從官共四十五人丙午御毬
場殿宣夾馬都指揮使尹皓韓瑋以下將士五百人賜
酒食庚戌至西都御文明殿辛亥宰臣百寮起居于殿
前遂宣赴內宴賜方物有差丁巳至東都已未大明節
諸道節度刺史各進獻鞍馬銀器綾帛以祝壽宰臣百
官設齋相國寺壬戌御宣和殿宴宰臣文武百官十一
月辛未御宣和殿宴宰臣文武百官以大駕還京故也
庚辰御宣和殿宴宰臣文武百官出開明門登高僧臺
閱兵諸道節度使刺史各進賀冬田器鞍馬綾羅等戊

子賜文武百官帛乙未又宴宰臣文武百官于宣和殿

通鑑癸巳中書侍郎同平章事張策以刑部尚書致仕以左僕射楊涉同平章事十二月立二

王三恪南郊禮儀使狀伏以詩稱有客書載虞賓實因禪代之初必行興繼之命俾之助祭式表推恩兼垂恪敬之文別示優崇之典徵于歷代襲用舊章謹按唐朝以後魏元氏子孫韓國公爲三恪以周宇文氏子孫爲

介國公隋朝楊氏子孫爲鄴國公爲二王後今伏以國

家受禪封唐朝子孫李從爲萊國公今參詳合以介國

公爲三恪鄴國公萊國公爲二王後五代會要十二月

改左右天武爲龍虎軍左右龍虎爲天武軍左右天威爲羽林軍左右羽林爲天威軍左右英武爲神武軍左右神武爲英武軍

前朝置龍虎六軍謂之衛士至是以大武
神武英武等六軍易其軍號而任勳舊焉
癸丑獵畋于
含耀門外

開平三年正月戊辰朔帝御金祥殿受宰臣翰林學士
稱賀文武百官拜表于東上閣門己巳奉遷太廟四室
神主赴西京太常儀仗鼓吹導引齋車文武百官奉辭
于開明門外甲戌發東都百官扈從次中牟縣乙亥次
鄭州丙子次汜水縣河南尹張宗爽河陽節度使張歸
霸並來朝戊寅次偃師縣己卯備法駕六軍儀仗入西
都是日御文明殿受朝賀詔曰近年以來風俗未泰兵
革且繁正月燃燈廢停已久今屬創開鴻業初建洛陽

方在上春務達陽氣宜以正月十四十五十六日夜開坊市門一任公私燃燈祈福庚寅親享太廟辛卯祀昊天上帝于園丘是日降雪盈尺帝昇壇而雪霽禮畢御五鳳樓宣制大赦天下賜南郊行事官禮儀使趙光逢以下分物甲午上御文思殿宴羣臣賜金帛有差丙申

賜文武官帛有差命宣徽使王殷押絹一萬匹并茵褥

幃帟二百六十件賜張宗奭

歐陽史丙申羣臣上尊號曰睿文聖武廣孝皇帝

改西京貞觀殿爲文明殿含元殿爲朝元殿二月改思政殿爲金鑾殿敕東都曰自昇州作府建邑爲都未廣邦畿頗虧國體其以滑州酸棗縣長垣縣鄭州中牟縣

陽武縣宋州襄邑縣曹州戴邑縣許州扶溝縣鄆陵縣

陳州太康縣等九縣宜並割屬開封府仍昇爲畿縣

興地

廣記朱梁時楊氏據江淮于是吳越錢氏上言以淮寇未平恥聞逆姓請改松陽縣爲長松

丁酉宴

羣臣于崇勳殿甲辰又宴羣臣于崇勳殿蓋藩臣進賀

勉而從之丙午宗正寺請修興極永安光天咸寧諸陵

並令添修上下宮殿栽植松柏制可癸亥敕豐沛之基

寢園所在悽愴動關于情理充奉自繫于國章宜設陵

臺兼升縣望其輝州碭山縣宜爲赤縣仍以本縣令兼

四陵臺令同州節度使劉知俊奏延州都指揮使高萬

興部領節級家累三十八人來降三月以萬興檢校司

徒爲丹延等州安撫招討等使辛未詔曰同州邊隅繼
有士衆歸化暫思巡撫兼要指揮今幸蒲陝取九日進
發甲戌車駕發西都百官奉辭于師子門外丁丑次陝
州已卯次解縣河中節度使冀王友謙來奉迎庚辰至
河中府幸右軍舊杏園講武丙戌以朔方節度使兼中
書令韓遜爲潁川王遜本靈州牙校唐末據本鎮朝廷
因而授以節鉞四月丙申朔駐蹕河中壬寅辰時駕巡
于朝邑縣界焦黎店冀王友謙及崇政內諸司使扈從
至申時迴己亥御前殿宴宰臣及冀王友謙扈從官甲
寅宴宰臣及扈從官于內殿制易定節度使王處直進

封北平王福建節度使王審知封閩王廣州節度使劉
隱封南平王同州節度使劉知俊封大彭郡王山南東
道節度使楊師厚封宏農郡王五月乙丑朔朝遂命宰
臣及文武百官宴于內殿己卯車駕至西京癸未御崇
勲殿宴宰臣及文武官四品以上己丑復御崇勲殿宴
宰臣文武官四品以上升宋州爲宣武軍節鎮仍以亳
輝潁爲屬郡六月庚戌同州節度使劉知俊據本郡反
制令削奪劉知俊在身官爵仍徵發諸軍速令進討如
有軍前將士懷忠烈以知機賊內朋徒贖脅從而識變
便能梟夷逆豎擒獲凶渠務立殊功當行厚賞活捉得

劉知俊者賞錢一萬貫文便授忠武軍節度使竝賜莊宅各一所如活捉得劉知浣者賞錢一千貫文便與除刺史有官者超轉三階無官者特授兵部尚書如活捉得劉知俊骨肉及近上都將竝梟送闕廷者賞賜有差辛亥駕至蒲陝文武百官于新安縣奉迎劉知俊弟內直右保勝指揮使知浣自洛奔至潼關右龍虎軍十將張溫以上二十二入于潼關擒獲劉知浣送至行在敕劉知浣逆黨之中最爲頭角龍虎軍親兵之內實冠爪牙昨者攻取潼關率先用命尋則擒獲知浣最上立功頗壯軍威將除國難所懸賞格便可支分許賜官階固

須除授但昨捉獲劉知浣是張溫等二十二人一時向前共立功效其賞錢一千貫文數內一百貫文與最先打倒劉知浣衙官李稠四十三貫文與十將張溫二十人各與錢四十二貫八百五十文立功救命便授郡府亦緣同時立功人數不少所除刺史難議偏頗宜令逐月共支給正刺史料錢二百貫文數內十將張溫一人每月與十貫文餘二十一人每月每人各分九貫文仍起七月一日以後支給人與轉官職仍勘名銜分析申奏當與施行是月知俊奔鳳翔同州平七月乙丑敕行宮將士陣歿者咸令所在給槨積津置歸鄉里戰卒聞

之悉感涕丙寅命宰臣楊涉赴西都以孟秋享太廟改
章善門爲左右銀臺門其左右銀臺門卻改爲左右興
善門敕大內皇牆使諸門素來未得嚴謹將令整肅須
示條章宜令控鶴指揮應于諸門各添差控鶴官兩人
守帖把門其諸司使并諸司諸色人竝勒于左右銀臺
門外下馬不得將領行官一人輒入門裏其逐日諸道
奉進客省使于千秋門外排當抗勒控鶴官昇擡至內
門前準例令黃門殿直以下昇進輒不得令諸色一人
到千秋門內其興善門仍令長官關鎖不用逐日開閉
是日又敕皇牆大內本尚深嚴宮禁諸門豈宜輕易未

當條制交下因循苟出入之無常且公私之不便須加

鈐轄用戒門閭宜令宣徽院使等切準此處分進封幽

州節度使河間郡王劉守光爲燕王

通鑑七月癸酉帝發陝州乙亥至洛

陽寢疾

已丑夕寢殿棟折詰旦召近臣諸王視棟折之迹

帝慘然曰幾與卿等不相見君臣對泣久之遂詔有司

釋放禁人從八月朔日後減膳進素食禁屠宰避正殿

修佛事以禳其咎商州刺史李稠棄郡西奔本州將吏

以都牙校李玫權知州事八月甲午以秋稼將登霖雨

特甚命宰臣以下禱于社稷諸祠詔曰封嶽告功前王

重事祭天肆覲有國恒規朕以眇身恭臨大寶旣功德

未敷于天下而災祥互降于城中慮于告謝之儀有缺齋虔之禮爰修昭報用契幽通宜令中書侍郎平章事于兢往東嶽祭拜禱祀訖聞奏又敕朕以干戈尚熾華夏未寧宜循卑菲之言用致雍熙之化起八月一日常朝不御金鑾崇勳兩殿只于便殿聽政辛亥制諸郡如有陣歿將士仰逐都安存家屬如有弟兄兒姪便給與衣糧充役贈故山東道節度使畱後王珏太保贈故同州觀察判官盧匪躬工部尚書珏故河陽將累以軍功爲郡守主畱事于襄陽爲小將王求所殺匪躬嘗爲劉知愷判官知俊反不偕行爲亂兵所害敕建國之初用

兵未罷諸道章表皆繫軍機不欲滯留用防緩急其諸道所有軍事申奏宜令至右銀臺門委客省畫時引進諸道公事卽依前四方館準例收接司天臺奏今月二十七日平明前東南丙上去山高三尺以來老人星見測在井宿十一度其色光明闊大敕所在長吏放雜差役兩稅外不得妄有科配自今後州縣府鎮凡使命經過若不執敕文券並不得妄差人驢及取索一物已上又今歲秋田皆期大稔仰所在切如條流本分納稅及加耗外勿令更有科索切戒所繇人更不得于鄉村乞託擾人聞八月襄陽叛將李洪差小將進表帝示以含

宏特賜敕書慰諭又制左馮背叛元惡遁逃如聞相濟
之徒多是脅從之輩若能迴心向國轉禍全身當與加
恩必不問罪仍令同華雍等州切加招諭如能梟斬溫
韜或以鎮寨歸化必加厚賞仍獎官班兼委本界招復
人戶切加安存己卯幸西苑觀稼

舊五代史卷四

舊五代史卷四攷證

梁太祖紀四二月 案通鑑二月癸亥酖殺濟陰王于曹州新唐書昭宣帝紀亦云二月遇弒歐陽史作正月己亥卜郊于西都弒濟陰王與諸書異

辛巳以同州節度使劉知俊爲潞州行營招討使 案辛巳歐陽史通鑑俱作壬午

時帝在澤州拜二相于行在 案通鑑云癸巳張文蔚卒癸卯楊涉罷爲右僕射是二相之拜以代文蔚涉也又承旨學士梁代避諱改爲奉旨通鑑及歐陽史仍作承旨

壬子至東京 案五代春秋作丙午帝還東都歐陽史
作壬子至澤州惟通鑑與是書同

淮寇侵軼潭岳邊境 侵軼原作侵軼今據文改正

王師敗于潞州 案潞州之敗歐陽史作五月己丑通
鑑作壬申

帝以此郡五嶺三湘水陸會合之地 此郡原作北郡
今據文改正

時代綿寢 綿寢原作綿浸今據通鑑注改正

丙戌至陝州 丙戌通鑑作乙酉

丁巳至東都 案通鑑攷異引編遺錄作乙卯實錄作

丁巳今攷五代春秋作丁巳與是書同歐陽史作丁未與是書異

許州扶溝縣 案扶溝下脫縣字今據文增入

甲寅福建節度使王審知封閩王廣州節度使劉隱封南平王 甲寅通鑑作庚子與是書異

如活捉得劉知浣者賞錢一千貫文 案一千原作一萬今據通鑑長編引梁代賞功之典改正

辛亥駕至蒲陝 案通鑑作癸丑帝至陝與是書前後異

其興善門仍令長官關鎖 興善原作章善今據上文

及五代會要改正

安巴堅舊作阿保機今改

舊五代史卷四攷證

舊五代史卷五

宋門下侍郎參知政事監修國史薛居正等撰

梁書第五

太祖紀五

開平三年九月癸巳朔御崇勳殿宴羣臣文武百官賜張宗奭楊師厚白綾各三百匹銀鞍轡馬丁酉上幸崇政院宴內臣賜院使敬翔直學士李班等繪絲有差以門下侍郎平章事薛貽矩判建昌宮事兼延資庫使制內外使臣復命未見便歸私第者朝廷命使臣下奉行惟于辭見之儀合守敬恭之道近者凡差出使往復皆

越常規或已辭而尚在本家或未見而先歸私第但從
已便莫稟王程在禮敬而殊乖置典章而私舉宜令御
史臺別具條流事件具黜罰等奏聞庚子殿直王唐福
自襄城走馬以大軍勝捷逆將李洪歸降事上聞賜唐
福絹銀有加宰臣百官上表稱賀壬寅開封府虞候李
繼業齎襄州都指揮使陳暉奏狀以今日五日殺戮逆
黨千人竝生擒都指揮使傅霸以下節級共五百人收

復襄州入戶歸業

通鑑八月陳暉軍至襄州李洪逆戰大敗下求死九月丁酉拔其城斬叛

兵千人執李洪楊虔等送洛陽斬之

癸卯帝御文明殿以收復襄漢受宰

臣以下稱賀辛亥侍中韓建罷守太保左僕射同平章

事楊涉罷守本官以太常卿趙光逢爲中書侍郎平章
事翰林學士奉旨工部侍郎知制誥杜曉爲尚書戶部
侍郎平章事詔曰秋冬之際陰雨相仍所司擇日拜郊
或慮臨時妨事宜令別更擇日奏聞是月禮儀使奏據
所司擇十月二日祀圓丘今參詳十月十七日以後入
十一月節十一月二日冬至一陽生之辰宜行親告之
禮從之河中奏準宣詔使有銅牌者所至卽易騎以遣
十月癸未大明節帝御文明殿設齋僧道召宰臣翰林
學士預之諸道節度刺史及內外諸司使咸有進獻詔
以寇盜未平凡諸給過所並令司門郎中員外郎出給

以杜姦詐十一月癸巳朔帝齋于內殿不視朝甲午日
長至五更一點自大內出于文明殿受宰臣以下起居
自五鳳樓出南郊左右金吾太常兵部等司儀仗法駕
鹵簿及左右內直控鶴等引從赴壇文武百官太保韓
建以下班以候帝升壇告謝司天臺奏冬至日自夜半
後祥風微扇帝座澄明至曉黃雲捧日丙申畋于上東
門外戊戌制曰夫嚴親報本所以通神明流澤覃休所
以惠黎庶斯蓋邦家不易之道皇王自昔之規敢歎大
猷茲惟古義粵朕受命于今三年何曾不寅畏農興焦
勞夕惕師唐虞之典上則于乾功挹殷夏之源下涵于

民極欲使萬方有裕六辨無愆然而志有所未孚理有
所未達致奸宄作孽旱靈爲災驕將守邊擁牙旗而背
義積陰馭氣陵玉燭以干和載攷休徵式昭至警朕是
以仰高俯厚靡惜于責躬履薄臨淵冀昭于元覽兢兢
慄慄夙夜匪寧及夫動干戈而必契靈誅陳儀齋而克
章善應苟非天垂丕佑神贊殊休則安可致夷兇渠就
不戰之功變沴戾氣作有年之慶況靈旗北指喪羆貔
于亂轍之間飛騎西臨下鄜翟若走丸之易息一隅之
煙燧復千里之封疆而又掃蕩左馮討除峴首故得外
戎內夏益知天命之攸歸喙息蚊行共識皇基之永固

仰懷昭應欲報無階爰因南至之辰親展園丘之禮茲
惟大慶必及下民乃宏渙汗之私以錫疲羸之幸所冀
漸增蘇息亟致和平噫朕自臨御以來歲時尚邇氛昏
未殄討伐猶頻甲兵須議于餽糧飛輓頻勞于編戶事
非獲已慮若納隍宜所在長吏倍切撫綏明加勉諭每
官中抽差徭役禁猾吏廣斂貪求免至流散靡依凋弊
不濟宜令河南府開封府及諸道觀察使切加鈐轄刺
史縣令不得因緣賦斂分外擾人凡關庶獄每望輕刑
只候纔罷用軍必當便議優給德音節文內有未該者
宜令所司類列條件奏聞己亥以羅周翰爲天雄軍節

度副使知府事從鄴王紹威請也辛丑幸穀水戊午御
文明殿冊太傅張宗奭太保韓建受冊畢金吾仗引昇
輅車儀仗導謁太廟訖赴尚書省上幸榆林坡閱兵教
諸都馬步兵敕改乾文院爲文思院行殿爲興安殿毬
場爲興安毬場又改弓箭庫殿爲宣武殿靈州奏鳳翔
賊將劉知俊率邠岐秦涇之師侵迫州城帝遣陝州康
懷英華州寇彥卿率兵攻迫邠寧以緩朔方之寇五代春秋
十一月秦人來侵靈州陝州康懷英侵秦克
寧慶衍三州秦人來襲懷英兵敗于昇平 十二月乙
丑臘較獵于甘泉驛以蒲州肇迹之地且因經畧廊延
于是巡幸數月暇日游豫至焦梨店頗述前事念王重

榮舊功下詔褒獎而封崇之國子監奏創造文宣王廟
仍請率在朝及天下現任官僚俸錢每貫每月尅一十
五文充土木之植允之是歲以所率官僚俸錢修文宣
王廟福建節度使王審知奏捨錢造寺一所請賜寺額
敕名大梁萬歲之寺仍許度僧四十九人贈牢牆使王
仁嗣司空故同州押衙史肇右僕射押衙王彥洪高漢
詮邱奉言仇瓊並刑部尚書王筠御史司憲初劉知俊
將叛謀會諸將詢所宜仁嗣等持正不撓悉羅其酷至
是褒贈之劉守光上言于薊州西與兄守文戰擒守文
開平四年正月壬辰朔帝御朝元殿受百官稱賀始用

禮樂也敕公事難于稽遲居處悉皆遙遠其逐日當直中書舍人及吏部司封知印郎官少府監及篆印文兼書寫告身人吏等並宜輪次于中書側近宿止乙未帝出師子門至榆林坡下閱教壬寅幸保寧毬場錫宴宰臣及文武百官賜宰臣張宗奭已下分物有加賜廣王分物及湖南開元寺禪長老可復號惠光大師仍賜紫衣二月乙丑幸甘水亭出師子門幸榆林東北坡教諸軍兵事賜潞州投歸軍使張行恭錦服銀帶竝食戊辰宴于金鑿殿甲戌以春時無事頻命宰臣及勳戚宴于河南府池亭辛巳楊師厚赴鎮于陝寒食假諸道節度

使郡守勲臣競以春服賀又連清明宴以鞍轡馬及金銀器羅錦進者迨千萬乃御宣威殿宴宰臣及文武官四品已上己丑出光政門至穀水觀麥三月壬辰幸崇政院宴勲臣己亥幸天驥院宴侍臣壬寅幸甘水亭宴宰臣勲戚翰林學士辛亥宴宰臣于內殿丙辰于興安毬場大饗六軍樂春時也四月壬戌詔曰追養以祿王者推歸厚之恩欲靜而風人子抱終身之感其以刑部尚書致仕張策及三品四品常參官二十二人先世各追贈一等乙丑宴崇政院帝在藩及踐阼勵精求理深戒逸樂未嘗命堂上歌舞是日止令內妓升階擊鼓弄

甚懼至午而罷丁卯宋州節度使衡王友諒進瑞麥

一莖三穗

通鑑友諒獻瑞麥帝曰豐年爲上瑞今宋州大水安用此爲詔除本縣令名遣使詰責友

諒

丙戌幸建春門閱新樓至七里屯觀麥召從官食于

樓河南張昌孫及蒲同主事吏賜物各有差帝過朝邑見鎮將位在縣令上問左右或對曰宿官秩高帝曰令長字人也鎮使捕盜耳且鎮將多是邑民奈何得居民父母上是無禮也至是敕天下鎮使官秩無高卑位在邑令下葉縣鎮遏使馮德武于蔡州西平縣界殺戮山賊擒首領張瀆等七人以獻鎮海軍節度使錢鏐擊高澧于湖州大敗之梟夷擒殺萬人拔其郡湖州平先是

禮以州叛入淮南故詔鏐討之也五月己丑朔以連雨不止至壬辰御文明殿命宰臣分拜祠廟自朔旦至癸巳內外以午日奉獻巨萬計馬三千蹄餘稱是復相率助修內壘甲辰詔曰奇邪亂正假僞奪真旣刑典之不容宜違犯而勿赦應東西兩京及諸道州府創造假犀玉真珠腰帶璧珥竝諸色售用等一切禁斷不得更造作如公私人家先已有者所在送納長吏對面毀棄如行數後有人故違必當極法仍委所在州府差人檢察收捕明行處斷魏博節度使守太師兼中書令鄴王羅紹威薨帝哀慟曰天不使我一海內何奪忠臣之速也

詔贈尚書令六月己未朔詔軍鎮勿起土功七月壬子

宴宰臣河南尹翰林學士兩街使于甘水亭丙辰宴羣

臣于宣威殿賜物有差劉知俊攻逼夏州

通鑑七月岐王與汾涇二

帥各遣使告晉請合兵攻定難節度使李仁福晉王以遣振武節度使周德威將兵會之合五萬衆圍夏州

宣化軍留後李思安爲東北面行營都指揮使陝州節

度使楊師厚爲西路行營招討使福州貢方物獻桐皮

扇廣州貢犀玉獻舶上薔薇水時陳許汝蔡潁五州境

內有蝻爲災俄而許州上言有野禽羣飛蔽空旬日之

間食蝻皆盡是歲乃大有秋八月車駕西征己巳次陝

州是時憫雨且命宰臣從官分禱靈迹日中而雨翼日

止帝大悅辛未老人星見是日宴本府節度使楊師厚
及扈從官于行宮賜師厚帛千匹仍授西路行營招討
使丙子宴文武從官軍使已下設龜茲樂賜物有差九
月丁亥朔命宰臣于兢赴西都祀昊天上帝于園丘甲
午至西京下詔曰朕聞歷代帝王首推堯舜爲人父母
孰比禹湯睿謀高出于古先聖德普聞于天下尚或卑
躬待士屈已求賢俯仰星雲慮一民之遺逸網羅巖穴
恐片善之韜藏延爵祿以徵求設丹青而訪召使其爲
政樂在進賢蓋繇國有萬幾朝稱百揆非才不治得士
則昌自朕光宅中區迄今三載宵分輟寐日旰忘餐思

共力于廟謀庶永清于王道而乃朝廷之內或未盡于
昌言軍旅之間亦罕聞于奇策眷言方岳下及山林豈
無英奇副我延佇諸道都督觀察防禦使等或勲高翊
世或才號知人心于途巷之賢備察芻蕘之士詔到可
精搜郡邑博訪賢良諭之以千載一時約之以高官美
秩諒無求備惟在得人如有卓犖不羈沈潛自負通霸
王之上略達文武之大綱究古今刑政之源識禮樂質
文之變朕則待之不次委以非常用佐經綸豈勞階級
如或一言拔俗一事出羣亦當舍短從長隨才授任大
小方圓之器寧限九流溫良恭儉之人難誣十室勉思

薦舉勿至因循俟爾發揚慰予翹渴仍從別敕處分辛丑以久雨命宰臣薛貽矩禁定鼎門趙光逢祠嵩岳敕魏博管內刺史比來州務竝委督郵遂使曹官擅其威權州牧同于閒冗俾循通制宜塞異端竝依河南諸州例刺史得以專達壬寅頒奪馬令先是王師擊賊獲馬多上獻至是盡止之蓋欲邀其奮擊之功也乙巳王師敗蕃寇于夏州初劉知俊誘沙陁振武賊帥周德威涇原賊帥李繼鸞合步騎五萬大舉欲俯拾夏臺節度使王仁福兵力俱乏以急來告先是供奉官張漢攻宣諭在壁國禮使杜廷隱賜幣于夏及石堡寨聞賊至以防

卒三百人馳入州既而外兵圍合廷隱漢攻與指揮使張初李君用率州民防卒與仁福部分固守晝夜戮力踰月及郟延援至大軍奮擊敗之河東邠岐賊分路逃

遁夏州圍解

通鑑甲申遣夾馬指揮使李遇劉縮自郟延趨銀夏李遇等至夏州岐晉兵皆解去

丙午詔曰劉知俊貴爲方伯尊極郡王而乃背誕朝恩竄投賊壘固神人之共怒諒天地所不容雖命討除尚稽擒戮宜懸爵賞以大功名必有忠貞咸思憤發有生擒劉知俊者賞錢千萬授節度使首級次之得孟審登者錢百萬除刺史得孫亢卓瓌劉儒張鄰等賞有差乙卯宴會羣臣于宣威殿

舊五代史卷五

舊五代史卷五攷證

梁太祖紀五襄州都指揮使陳暉 案歐陽史作行營

招討使左衛上將軍陳暉

復收襄州人戶歸業 案歐陽史云九月壬寅陳暉克

襄州據是書則陳暉以壬寅奏捷非以是日克城攷

通鑑克城繫九月丁酉與是書今月五日正合歐陽

史蓋據奏捷之日而書之耳

以收復襄漢受宰臣以下稱賀 案襄漢下原本衍收

字今刪正

并令司門郎中員外郎 司門原本作司關攷五代會

要有司門郎中今改正

故得外戎內夏 內夏原本訛內憂今改正

辛亥宴宰臣于內殿 案原本脫宴字今增入

鎮海軍節度使錢鏐擊高澧于湖州大敗之 案九國

志高澧以三年十月叛四年二月奔吳是書繫于四

月蓋以奏聞之月爲據

劉知俊攻逼夏州 案五代春秋八月晉人秦人侵夏

州與是書及通鑑異

甲午至西京 案五代春秋作九月己丑帝還西都歐

陽史同通鑑作己丑上發陝甲午至洛陽

國禮使杜廷隱 廷隱原本作定隱下仍作廷隱今據

九國志改正

舊五代史卷五攷證

舊五代史卷六

宋門下侍郎參知政事監修國史薛居正等撰

梁書第六

太祖紀六

開平四年十月乙亥東京博王友文入覲召之也已卯以新修天驥院開宴落成內外並獻馬而魏博進絹四萬匹爲駟價壬午以冬設禁軍幸興安鞠場召文武百官宴幸開化大閱軍實十一月丁亥朔幸廣王第作樂辛卯宴文武四品已上于宣威殿庚戌幸左龍虎軍宴羣臣甲寅幸右龍虎軍宴羣臣戊戌詔曰自朔至今暴

風未息諒惟不德致此咎徵皇天動威罔敢不懼宜徧
命祈禱副朕意焉差官分往祠所止風已亥日南至帝
被袞冕御朝元殿列細仗奏樂于庭羣臣稱賀帝畋于
伊水乙巳詔曰關防者所以譏異服察異言也況天下
未息兵民多姦改形易衣覘我戎事此者有謀皆以詐
敗而未嘗罪所過地叛將逃卒竊其妻孥而影附使者
亦未嘗詰其所經今海內未同而緩法弛禁非所以息
姦詐止奔亡也應在京諸司不得擅給公驗如有出外
須執憑繇者其司門過所先須經中書門下點檢宜委
宰臣趙光逢專判出給俾繇顯重冀絕姦源仍下兩京

河陽及六軍諸衛御史臺各加鈐轄公私行李復不得帶挾家口向西其襄鄧鄜延等道並同處分以寧國軍節度使王景仁充北面行營都招討使潞州副招討使韓勅爲副相州刺史李思安爲先鋒使時鎮州王鎰定

州王處直叛結連晉人故遣將討之

五代會要十一月十四日司天奏月

蝕不宜用兵時王景仁方總大軍北伐追之不及

至五年正月二日果爲後唐莊宗大敗于柏鄉 十二

月辛酉宴文武四品已上于宣威殿親閱禁軍命格鬪于教馬亭已巳詔曰滑宋輝毫等州水滂敗傷人戶愁歎朕爲民父母良用痛心其令本州分等級賑貸所在長吏監臨周給務令存濟壬辰賑貸東郡畿內如宋滑

制

乾化元年正月丙戌朔日有食之帝素服避殿百官守
司以恭天事明復而止制曰兩漢以來日食地震百官
各上封事指陳得失蓋欲周知時病盡達物情用緝國
章以奉天誠朕每思逆耳罔忌觸鱗將治政經庶開言
路况茲謫見當有咎徵其在列辟羣臣危言正諫極萬
邦之利害致六合之殷昌毗予一人永建皇極二日日
旁有祲氣向背若環耳崇政使敬翔望之曰兵可憂矣
帝爲之盱食是日果爲晉軍及鎮定之師所敗都將十
餘人被擒餘衆奔潰庚寅制曰扈氏不恭固難去戰鬼

方未服尚或勞師其蟻聚餘妖狐鳴醜類棄天常而拒命據地險以偷生言事討除將期戡定問罪止誅于元惡挺災可憫于遺黎每念傷夷良深愧歎應天兵所至之地宜令將帥節級嚴戒軍伍不得焚燒廬舍開發邱壠毀廢農桑驅掠士女使其背叛之俗知予弔伐之心又制曰戎機方切國用未殷養兵須藉于賦租稅粟尚煩于力役所在長吏不得因緣徵發自務貪求苟有故違必行重典立法垂制詳刑定科傳之無窮守而勿失中書門下所奏新定格式律令已頒下中外各委所在長吏切務遵行盡革煩苛皆除在濫用副哀矜之旨無

違欽恤之言詔徵陝州鎮國軍節度使楊師厚至京見

于崇勳殿帝指授方略依前充北面都招討使恩賚甚

厚使督軍進發

五代會要二月晉師侵魏州楊師厚帥師援邢州晉人還師

二月丙

辰朔帝御文明殿羣臣入閣以蔡州順化軍指揮使王

存儼權知軍州事蔡人久習叛逆刺史張慎思又哀斂

無狀帝追慎思至京而久未命代右廂指揮使劉行琮

乘虛作亂因縱火驅擁爲渡淮計存儼誅行琮而撫遏

其衆都將鄭遵與其下奉存儼爲主而以衆情馳奏時

東京畱守博王友文不先請遂討其亂兵至馮陵上聞

之日誅行琮功也然存儼方懼若臨之以兵蔡必速飛

矣遂馳使還軍而擢授存儼蔡人安之壬戌詔曰東京

舊邦久不巡幸宜以今月九日幸東都扈從文武官委

中書門下量閒劇處分宰臣上言曰龍興天府久望法

駕但陛下始康愈未宜涉寒願少留清蹕從之

五代會要二月

救食人之食者憂人之事況丞相尊位參決大政而甲

堂封未給且無餐錢朕甚愧之宜令食萬錢之半子幸曜村民舍閱農事庚午幸白馬坡詔金吾大將軍

待制官各奏事武安軍節度使馬殷進呈虔州刺史盧

延昌牋表虔州本支郡也兵甚銳自得韶州益强大昇

爲百勝軍使始洪州之陷盧光稠願收復使府立功自

効上因兼授江西觀察畱後光稠卒復命延昌領州事

方伯亦頗慰薦楊渭遣人僞署爵秩延昌佯受官牒禮遣其使因湖南自表其事曰郡小寇迫欲緩其奸謀且開導貢路非敢貳也以其僞制來自陳上覽奏曰我方有北事不可不甚加撫卹尋兼授鎮南將軍節度使觀察畱後命使慰勞

九國志盧延昌歸命于吳僞乞命于梁

三月辛卯以久

旱令宰臣分禱靈迹翼日大澍雨丙申幸甘水亭召宰臣翰林學士尚書侍郎孔續已下八人扈從宴樂甚歡戊戌幸右龍虎軍召文武官四品已上宴于新殿甲辰幸左龍虎軍新殿宴文武官四品已上四月丁卯幸龍虎門召宰臣學士金吾上將軍大將軍侍宴廣化寺壬

申契丹遣使來貢丁丑幸宣威殿宴文武官四品已上
及軍使蕃客已卯又幸左龍虎軍宴羣臣詔曰邠岐未
滅關隴多虞宜擇親賢總茲戎任應關西同雍華鄜延
夏等六道兵馬並委冀王收掌指揮凡有抽差先申西
面都招討使仍別奏聞庶合機權以寧邊鄙五月甲申
朔帝被冕旒御朝元殿視朝仗衛如式制改開平五年
爲乾化元年大赦天下詔方伯州牧近未加恩者並遷
爵秩復大賚軍旅普宴于宣威殿賜帛各有差制封延
州節度使高萬興爲渤海郡王諸道節度使錢鏐張宗
奭馬殷王審知劉隱各賜一子六品正員官高季昌賜

一子八品正員官賀德倫賜一子九品正員官癸巳觀
稼于伊水登建春門幸會節坊張宗爽私第臨亭阜視
物色賞賜甚厚詔左銀臺門朝參諸司使庫使已下不
得帶從人入城親王許一二人執條牀手簡餘悉止門
外闌入者抵律闔守不禁與所犯同先時門通內無門
籍且多勳戚車騎衆者尤不敢呵察至是有以客星凌
犯上言者遂令止隔清海軍節度使守侍中兼中書令
劉隱薨輟朝三日百僚詣閣門奉慰六月乙卯命北面
都招討使鎮國軍節度使楊師厚出屯邢洛丁巳鎮定
鈔我湯陰詔曰常山背義易水效尤誘其蕃戎動我邊

鄱南侵相魏東出邢洺是用遣將徂征爲人除害但初
頒赦令不欲食言宥而伐之諒非獲已況聞謀始不自
帥臣致此厲階並由姦佞密通人使潛結沙陀旣懼罪
誅乃生離叛今雖行討伐已舉師徒亦開詔諭之門不
阻歸降之路矧又王鎔處直未曾削爵除名若翻然改
圖不遠而復必仍舊貫當保全功如有率衆向明拔州
效順亦行殊賞冀徇來情免令受弊于疲民用示維新
于汚俗宜令行營都招討使及陳暉軍前準此敕文散
加招諭將安衆懼特舉明恩鎮州只罪李宏規一人其
餘一切不問詔修天宮佛寺又湖南奏潭州僧法思桂

州僧歸真竝乞賜紫衣從之七月帝不豫稍厭秋暑自

辛丑幸會節坊張宗奭私第宰臣視事于歸仁亭子崇

政使內諸司及翰林院竝止于河南令廨署至甲辰復

歸大內八月庚申幸保寧殿閱天興控鶴兵事軍使將

校各有賜癸亥老人星見戊辰幸故上陽宮至于榆林

觀稼丙子閱四蕃將軍屯衛兵士于天津橋南至龍門

廣化寺戊寅幸興安鞠場大教閱帝自指麾無不踊抃

坐作進退聲振宮掖右神武統軍丁審衢對御以紅帛

囊劍擬乘輿物帝曰宿將也恕之以劉重霸代其任九

月辛巳朔帝御文明殿羣臣入閣刑法待制官各奏事

已丑宴羣臣于興安殿庚子親御六師次于河陽甲辰
至于衛州乙巳至于宜溝幸民劉達墅丙午至相州賞
左親騎指揮使張仙右雲騎指揮使宋鐸嘗身先陷陣
各賜帛十月辛亥朔駐蹕于相州宰臣洎文武從官並
詣行宮起居戶部郎中孔昌序齋畱都百官冬朔起居
表至自西京諸道節度使刺史諸藩府畱後各以冬朔
起居表來上制以郢王友珪充控鶴指揮使諸軍都虞
候閻寶爲御營使有司以立冬太廟薦享上言詔丞相
杜曉赴西都攝祭行事癸丑閱武于州闔之南樓左龍
驤都教練使鄧季筠魏博馬軍都指揮使何令稠右廂

馬軍都指揮使陳令勳以部下馬瘦竝腰斬于軍門甲寅將以其夕幸魏縣命閤門使李郁報宰臣兼敕內外是夜車駕發軔于都署乙卯次洹水丙辰至魏縣先鋒將黃文靖伏誅己未帝御朝元門以回鶻吐蕃二大國首領入覲故也癸亥令諸軍指揮使及四蕃將軍賜食于行宮之外廡戊辰幸邑西之白龍潭以觀魚焉旣而漁人獲巨魚以獻帝命放之中流從臣以帝有仁惻之心皆相顧欣然是日名其潭曰萬歲潭丙子帝御城東教場閱兵諸軍都指揮北面招討使太尉楊師厚總領鐵馬步甲十萬廣亘十數里陳焉士卒之雄銳部隊之

嚴肅旌旗之雜，逐戈甲之矜耀，屹若山岳，勢動天地，帝甚悅焉。卽令丞相洎文武從臣、列侍、賜食，逮晚方歸。十一月辛巳朔，上駐蹕魏縣，從官自丞相而下，並詣行宮起居，留都文武百官及諸道節度使、防禦使、刺史、諸藩府，留後各奉表起居。壬午，帝以邊事稍息，宣命還京師。

通鑑帝以夾寨柏鄉屢失利，故力疾北巡。思一雪其恥，意鬱鬱多躁忿。功臣宿將往往以小過被誅，衆心益懼。旣而晉趙兵不出，十一月壬午，帝南還。

車駕發自行闕，夕次洹水縣。癸未

至內黃縣，甲申至黎陽縣。乙酉，命從官丞相而下宴。子行次丁亥，次衛州。戊子，晨次新鄉，夕止。獲嘉。己丑，次武陟。庚寅，次溫縣。延州節度使高萬興奏當軍都指揮使

高萬金統領兵士今月五日收鹽州偽刺史高行存泥
首來降丞相及文武百官各上表稱賀辛卯次孟州命
散騎常侍孫騰右諫議大夫張衍光祿卿李翼各齋香
祝版告祭于孟津之望祠畱都文武官左僕射楊涉洎
孟州守李周彝等皆匍匐東郊迎拜其文武官並令先
還壬辰詔旦離孟州晚至都宣宰臣各赴望祠禱雨故
事皆以兩省無功職事爲之帝憂民重農尤以足食足
兵爲念爰自御極每愆陽積陰多命丞相躬其事辛丑
大雨雪宰臣及文武師長各奉表賀焉十二月詔以時
雪稍愆命丞相及三省官各詣望祠祈禱癸酉臘假詔

諸王與河南尹左右金吾六統軍等較獵于近苑命大

理卿王鄴使于安南左散騎常侍吳藹使于朗州皆以

旌節官誥錫之也又命將作少監姜宏道爲朗州旌節

官使副

五代會要舊制巡撫黜陟冊命弔贈入番等使選朝臣爲之其宣慰加官送旌節卽以中官爲

之今以三品送旌節新例也

延州節度使高萬興奏領軍于邠州界

蒿子谷韋家寨殺戮寧慶兩州賊軍約二千餘人竝生

擒都頭指揮使及奪馬器甲等事其入奏軍將使宣召

赴內殿賜對以銀器綵物錫之宰臣及文武官各奉表

賀是月魏博節度上言于涇縣北戮殺鎮州王鎔兵士

七千餘人奪馬二千餘匹戈甲未知其數竝擒都將以

下四十餘人兩浙進大方茶二萬觔琢畫宮衣五百副
廣州貢犀象奇珍及金銀等其估數千萬安南兩使畱
後曲美通鑑十二月戊午以靜海曲美爲節度使進筒中蕉五百匹龍腦鬱
金各五瓶他海貨等有差又進南蠻通好金器六物銀
器十二并乾陀綾花緞越跣等雜織奇巧者各三十件
福建進戶部所支權課葛三萬五千匹

舊五代史卷六攷證

梁太祖紀六相州刺史李思安爲先鋒使 相州原本

訛湘州今據通鑑改正

向背若環耳 環耳原本訛環爾今據五代會要改正
以其僞制來自陳 僞原本訛爲今改正

守侍中兼中書令劉隱卒 案劉隱卒五代會要五代
春秋俱作五月惟通鑑作三月與是書異

丁巳鎮定抄我湯陰 湯陰原本作蕩陰今從通鑑及

歐陽史改正

命閭門使李郁報宰臣兼敕內外 案李郁下原本衍

寶字今據列傳刪正

己未帝御朝元門以回鶻吐蕃入覲故也 案己未歐

陽史作乙未

舊五代史卷六攷證

舊五代史卷七

宋門下侍郎參知政事監修國史薛居正等撰

梁書第七

太祖紀第七

乾化二年正月宣上元夜任諸市及坊市各點彩燈金
吾不用禁夜近年已來以都下聚兵太廣未嘗令坊市
點燈故也甲申以時雪久愆命丞相及三省官羣望祈
禱詔曰謗木求規集囊貢事將裨理道豈限側言應內
外文武百官及草澤竝許上封事極言得失以丁審衢
爲陳州而審衢厚以鞍馬金帛爲謝恩之獻帝慮其漁

民復其獻而停之封保義節度使王檀爲琅邪郡王命
供奉官朱嶠于河南府宣取先收禁定州進奉官崔騰
竝僉從一十四人竝釋放仍命押領送至貝騰唐戶部
侍郎潔之子也廣明喪亂客于北諸侯爲定州節度使
王處存所辟去載領貢獻至闕未幾其帥稱兵遂繫之
至是帝念賓介之來又已出境特命縱而歸焉丙戌有
司以孟春太廟薦享上言命丞相杜曉攝祭行事丙申
夕熒惑犯房第二星二月庚戌中和節御崇勳殿召丞
相大學士河南尹略封訖于萬春門外廡賜以酒食五代
會要二月追封故魏博節度使羅宏信爲趙王癸丑敕曰今載春寒頗甚雨澤

仍愆司天監占以夏秋必多霖潦宜令所在郡縣告諭
百姓備淫雨之患庚申御宣威殿開宴丞相洎文武官
屬咸被召列侍竟日而罷壬戌帝將巡按北境中外戒
嚴詔以河南尹守中書令判六軍事張宗奭爲大內留
守中書門下奏差定文武官領務尤切宜扈駕者三十
八人詔工部尚書李皎左散騎常侍孫隲右諫議大夫
張衍兵部侍郎劉邈兵部郎中張雋光祿少卿盧秉彝
竝令扈蹕甲子發自洛師夕次河陽通鑑云至白馬頓
賜從官食多未至
遣騎趣之于路左散騎常侍孫隲右諫議大夫
夫張衍兵部郎中張雋最後至帝命撲殺之乙丑次溫
縣丙寅次武陟懷州刺史段明遠迎拜于境上其內外

所備咸豐需焉丁卯次獲嘉戊辰次衛州之新鄉己巳晨發衛州夕止淇門內衙十將使以十指揮兵士至于行在辛未駐蹕黎陽癸酉發自黎陽夕次內黃甲戌次

昌樂縣丁丑次于永濟縣青州節度使賀德倫奏統領兵士赴歷亭軍前戊寅至貝州命四丞相及學士李琪盧文度知制誥竇賞等十五人扈從其左常侍韋叡等

二十三人止焉己卯發自貝州夕駐蹕于野落三月庚

辰朔次于棗強縣之西原

通鑑辛巳至下博南登觀津豕趙將符習引數百騎巡邏

不知是帝遽前逼之或告曰晉兵大至矣帝棄行幄亟引兵趣棗強與楊師厚軍合丙戌鎮定諸

軍招討使楊師厚奏下棗強縣車駕即日疾馳南還丁

亥復至貝州庚寅楊師厚與副招討李周彝等準詔來

朝辛卯詔丞相翰林六學士文武從官都招討使及諸

軍統指揮使等賜食于行殿壬辰命以羊酒等各賜從

官甲午幸貝州之東闔閱武乙未帝復幸東闔閱騎軍

敕以攻下棗強縣有功將校杜暉等一十一人竝超加

檢校官衙官宋彥等二十五人竝超授軍職丙午次濟

源縣詔曰淑律將遷亢陽頗甚宜令魏州差官祈禱龍

潭戊申詔曰雨澤愆期祈禱未應宜令宰臣各于魏州

靈祠精加祈禱

五代會要三月詔曰夫隆興邦國必本于人民惠養疲羸凡資于令長苟選求

之踰濫固撫理之乖違如聞吏部擬官中書降授或緣親舊所請或爲勢要所干姑徇私情靡求才實茲念蠹

弊宜舉條章今後應中書用人及吏部注擬竝宜省藩
身之才業驗爲政之否臧必有可觀方可任用如或尙
行請說猶假貨財其所司人吏必當推窮重加懲斷四月己酉幸魏州金波亭賜

宴宰臣文武官及六學士甲寅夕月掩心大星丙辰敕

近者星辰違度式在修禳宜令兩京及宋州魏州取此
月至五月禁斷屠宰仍各于佛寺開建道場以迎福應

己未次黎陽縣通鑑乙卯博王友文來朝請帝還東都
丁巳發魏州己未至黎陽以疾淹留

東都畱守官吏奉表起居賜丞相從官酒食有差己巳
至東都博王友文以新創食殿上言并進準備內宴錢
三千貫銀器一千五百兩辛未宴于食殿召丞相及文
武從官等待焉帝泛九曲池御舟傾帝墮溺于池中宮

女侍官扶持登岸驚悸久之制加建昌宮使金紫光祿
大夫檢校司徒開封尹博王友文爲特進檢校太保兼
開封尹依前建昌宮使充東都畱守戊寅車駕發自東
京夕次中牟縣五月己卯朔從官文武自丞相而下竝
詣行殿起居親王及諸道藩帥咸奉表來上庚辰發自
鄭州至滎陽河南尹魏王宗奭望塵迎拜河陽畱後邵
贇懷州刺史段明遠等邇迓來迎夕次汜水縣帝召魏
王宗奭入對便于御前賜食數刻乃退壬午駐蹕于汜
水宰臣河南尹六學士竝于內殿起居敕以建昌宮事
委宰臣于兢領之

五代會要其年六月廢建昌宮以河南尹魏王張宗奭爲國計使凡天下

金穀兵戎舊隸建昌宮者悉主之

癸未帝發自汜水宣令邵贊段明遠

各歸所理午憇任村頓夕次孝義宮留都文武禮部尚

書孔續而下道左迎拜次偃師甲申至都文武臣奉迎

于東郊渤海遣使朝貢宰臣薛貽矩抱恙在假不克扈

從宣問旁午仍命且駐東京以俟良愈及薨帝震悼頗

久命雜苑使曹守璫往弔祭之又命輟六日七日八日

朝參丞相文武竝詣上閤門進名奉慰丁亥以彗星謫

見詔兩京見禁囚徒大辟罪以下遞減一等限三日內

疏理訖聞奏

五代會要彗見于靈臺之西至五月始降赦宥罪以答大譴又云五月壬戌夜熒惑

犯心大星去心四度順行司天奏大星爲帝王之星宜修省以答天譴

詔曰生育之人爰

當暑月乳哺之愛方及薰風儻肆意于刳屠豈推恩于
長養俾無殄暴以助發生宜令兩京及諸州府夏季內
禁斷屠宰及採捕天民之窮諒由賦分國章所在亦務
興仁所在鰥寡孤獨廢疾不濟者委長吏量加賑卹史
載葬枯用彰軫恤禮稱掩骼將致和平應兵戈之地有
暴露骸骨委所在長吏差人專攻收瘞國癘之文尚標
七祀良藥之市亦載三醫用憐無告之人宜徵有喜之
術凡有疫之處委長吏檢尋醫方于要路曉示如有家
無骨肉兼困窮不濟者卽仰長吏差醫給藥救療之辛
卯詔曰亢陽滋甚農事已傷宜令宰臣于兢赴中嶽杜

曉赴西嶽精切祈禱其近京靈廟宜委河南尹五帝壇

風師雨師九宮貴神委中書各差官祈之

通鑑閏月壬戌帝疾甚謂

近臣曰我經營天下三十年不意太原餘孽更昌熾如此吾觀其志不小天復奪我年我死諸兒非彼敵也吾無葬地矣因哽咽絕而復蘇帝長子柳王友裕早卒次假子友文帝特愛之常留守東都兼建昌宮使次郢王友珪其母亳州營倡也爲左右控鶴都指揮使次均王友貞爲東都馬步都指揮使帝雖未以友文爲太子意常屬之六月丁丑朔帝命敬翔出友珪爲萊州刺史卽命之官已宣旨未行敕時左遷者多追賜死友珪益恐戊寅友珪易服微行入左龍虎軍見統軍韓勅以情告之勅亦見功臣宿將多以小過被誅懼不自保遂相與合謀勅以牙兵五百人從友珪雜控鶴士入伏于禁中夜斬關入至寢殿侍疾者皆散走帝驚起問反者爲誰友珪曰非它人也帝曰我固疑此賊恨不早殺之汝悖逆如此天地豈容汝乎友珪曰老賊萬段友珪僕夫馮廷諤刺帝腹又出于背友珪自以敗甕裹之瘞于寢殿秘不發喪遣供奉官丁昭溥馳詣東都命均王友貞殺

友文已卯矯詔稱博王友文謀逆遣兵突入殿中賴郢
王友珪忠孝將兵誅之保全朕躬然疾因震驚彌致危
殆宜令友珪權主軍國之務韓勅爲友珪謀多出府庫
金帛賜諸軍及百官以取悅辛巳丁昭溥還聞友文已
死乃發喪宣遺五代史友珪葬太祖于伊闕縣號宣陵補太祖

朱全忠黃巢之先鋒巢入長安以刺史王鐸圍同州太
祖遂降鐸承制拜同州刺史黃巢滅准蔡間秦宗權復
盛朝廷以淮蔡與汴州相接太祖汴人必究其能否遂
移授宣武軍節度使以討宗權未幾滅之自是威福由
已朝廷不能制遂有天下先是民間傳讖曰五公符又
謂之李淳風轉天歌其字有八牛之年識者以八牛乃
朱字則太祖革命之應焉太祖之用兵也法令嚴峻每
戰逐隊主帥或有沒而不反者其餘皆斬之謂之跋隊
斬自是戰無不勝然健兒且多竄匿州郡疲于追捕因
下令文面健兒文面自此始也五代史闕文世傳梁
太祖迎昭宗于鳳翔素服待舉昭宗佯爲鞵系脫呼梁
祖曰全忠爲吾繫鞵梁祖不得已跪而結之流汗浹背
時天子扈蹕尚有衛兵昭宗意謂左右擒梁祖以殺之
其如無敢動者自是梁祖被召多不至盡去昭宗禁衛

皆用汴人矣臣謹按梁祖以天復三年迎唐昭宗于岐
下歲在甲子其年改天祐至國初建隆庚申歲纔五十
六年矣然則乾德七十歲人皆目覩其事蓋唐室自懿
宗失政天下亂離故武宗以下實錄不傳于世昭宗一
朝全無記注梁祖在位止及六年均帝朝詔史臣修梁
祖實錄岐下繫鞵之事恥而不書晉天福中史臣張昭
重修唐史始有昭宗本紀但云卽位之始有會昌之風
岐陽事迹不能追補此亦明唐昭宗有英睿之氣而衰
運不振又明左右無忠義奮發之臣致
梁祖得行其志有可警誠不可不書

舊五代史卷七

舊五代史卷七攷證

梁太祖紀七仍命押領送至貝 貝原本訛具今據通

鑑改正

略封訖 案此下疑有關文今無可校姑仍之

晨發衛州 案原本脫發字今據文增入

三月庚辰朔次于棗強縣之西原 案通鑑辛巳趣棗

疆與是書異

丙戌奏下棗疆縣車駕卽日南還丁亥復至貝州 案

通鑑帝以蓆縣未下引兵攻之丁亥始至縣西戊子

至冀州與是書異地又按五代春秋二月侵趙克棗

疆與是書異月

四月己酉幸魏州 案通鑑乙巳帝發貝州丁未至魏
州俱在三月與是書異

宜徵有喜之術 有喜原本訛有嘉今改正

九宮貴神 貴神原本訛降神今據通典及新唐書禮
志改正

舊五代史卷七攷證

舊五代史卷八

宋門下侍郎參知政事監修國史薛居正等撰

梁書第八

末帝紀上

末帝諱瑱初名友貞及卽位改名鐸貞明中又改今諱太祖第四子也母曰元貞皇后張氏以唐文德元年戊申歲九月十二日生于東京帝美容儀性沈厚寡言雅好儒士唐光化三年授河南府參軍太祖受禪封均王時太祖初置天興軍最爲親衛以帝爲左天興軍使開平四年夏進位檢校司空依前天興軍使充東京馬步

軍都指揮使乾化二年六月二日庶人友珪弑逆矯太祖詔遣供奉官丁昭溥馳至東京密令帝害博王友文友珪卽位以帝爲東京畱守行開封尹檢校司徒友珪以篡逆居位羣情不附會趙巖至東京從帝私讌因言及社稷事帝以誠款謀之巖曰此事易如反掌成敗在招討楊令公之手但得一言諭禁軍其事立辦巖時典禁軍洎還洛以謀告侍衛親軍袁象先帝令腹心馬慎交之魏州見師厚且言成事之日賜勞軍錢五十萬緡仍許兼鎮慎交燕人也素有膽辨乃說師厚曰郢王殺君害父篡居大位宮中荒淫靡所不至洛下人情已去

東京物望所歸公若因而成之則有輔立之功討賊之
効師厚猶豫未決謂從事曰吾于郢王君臣之分已定
無故改圖人謂我何慎交曰郢王以子弑父是曰元兇
均王爲君爲親正名仗義彼若一朝事成令公何情自
處師厚驚曰幾誤計耳乃令小校王舜賢至洛密與趙
巖袁象先圖議時有左右龍驤都在東京帝僞作友珪
詔遣還洛下先是劉重遇部下龍驤一指揮于懷州叛
經年搜捕其黨帝因遣人激怒其衆曰郢王以龍驤軍
嘗叛追汝等洛下將盡坑之翼日乃以僞詔示之

通鑑
攷異

梁太祖實錄丙戌東京言龍驤軍準詔追赴西京軍情
不肯進發實友珪徵之非友貞僞作但激怒言坑之耳

諸軍憂恐將校垂泣告帝乞指生路帝諭之曰先帝三十餘年經營社稷千征萬戰爾等皆曾從行今日先帝尚落人奸計爾等安所逃避因出梁祖御容以示諸將帝欷歔而泣曰郢王賊害君父違天逆地復欲屠滅親軍爾等苟能自趨洛陽擒取逆豎告謝先帝卽轉禍爲福矣衆踊躍曰王言是也皆呼萬歲請帝爲主時僞鳳歷元年二月十五日也帝乃遣人告趙巖袁象先傅暉朱珪等十七日象先引禁軍千人突入宮城遂誅友珪事定象先遣趙巖齎傳國寶至東京請帝卽位于洛陽帝報之曰夷門太祖創業之地居天下之衝北拒并汾

東至淮海國家藩鎮多在厥東命將出師利于便近若
都洛下非良圖也公等如堅推戴冊禮宜在東京賊平
之日卽謁洛陽陵廟是月帝卽位于東京乃去鳳歷之
號稱乾化三年詔曰我國家賞功罰罪必叶朝章報德
伸冤敢欺天道苟顯違于法制雖暫滯于歲時終振大
綱須歸至理重念太祖皇帝嘗開霸府有事四方迨建
皇朝載遷都邑每以主畱重務居守難才慎擇親賢方
膺寄任故博王友文才兼文武識達古今俾分憂于在
浚之郊亦共理于興王之地一心無易二紀于茲嘗施
惠于士民實有勞于家國去歲郢王友珪常懷逆節已

露凶鋒將不利于君親欲竊窺于神器此際值先皇寢疾大漸日臻博王乃密上封章請嚴宮禁因以萊州刺史授于郢王友珪纔覩宣頭俄行大逆豈有自縱兵于內殿卻翻事于東都又矯詔書枉加刑戮仍奪博王封爵又改姓名冤恥兩深欺誑何極伏賴上穹垂祐宗社降靈俾中外以叶謀致遐邇之共怒尋平內難獲勦元兇旣雪恥于同天且免譏于共國朕方期遁世敢竊臨人遽迫推崇爰膺繼嗣冤憤旣伸于幽顯霈澤宜及于下泉博王宜復官爵仍令有司擇日歸葬云三月丁未制曰朕仰膺天睠近雪家讎旋聞將相之謀請紹祖宗

之業羣情見迫三讓莫從祇受推崇懼不負荷方欲烝
嘗寢廟禋類郊丘合徵文體之辭用表事神之敬其或
于文尚淺在理未周亦冀隨時別圖制義雖臣子行孝
重更名于已孤而君父稱尊貴難知而易避今則虔遵
古典詳攷前聞允諧龜筮之占庶合帝王之道載惟涼
德尤媿嘉名中外羣寮當體朕意宜改名鐸庚戌以天
雄軍節度使充潞州行營都招討使開府儀同三司檢
校太尉兼侍中宏農郡王楊師厚爲檢校太師兼中書
令進封鄴王壬戌以夏州節度使檢校太尉同平章事
李仁福爲檢校太師進封隴西郡王戊辰以邢州保義

軍畱後檢校太保戴思遠爲檢校太傅充邢州節度使
庚午以鎮東軍節度副使充兩浙西面都指揮使行睦
州刺史馬綽爲檢校太傅同平章事領秦州雄武軍節
度使進封開國侯是月文武百官上言請以九月十二
日帝降誕日爲明聖節休假三日從之夏四月癸未以
西京內外諸軍馬步軍都指揮使檢校司徒左龍虎統
軍濮陽郡開國侯袁象先爲特進檢校太保同平章事
充鎮南軍節度江南西道觀察處置等使開封尹判在
京馬步諸軍事進封開國公增食邑一千戶丁酉宣義
軍節度副大使知節度事鄭滑濮等州觀察使檢校太

傅長沙郡開國公羅周翰加特進駙馬都尉五月乙巳
天雄軍節度使楊師厚及劉守奇率魏博邢洛徐兗鄆
滑之衆十萬討鎮州庚戌營于鎮之南門外壬子晉將
史建瑋自趙州領騎五百入于鎮州師厚知其有備自
九門移軍于下博劉守奇以一軍自貝州掠冀州衡水
阜城陷下博師厚自弓高渡御河逼滄州張萬進懼送
款師厚表請以萬進爲青州節度使以劉守奇爲滄州
節度使詔曰太祖皇帝六月二日大忌朕聞姬周已還
竝用通喪之禮炎漢之後方行易月之儀歷代相沿萬
幾斯重遂爲故實難遽改更朕頃邁家寃近平內難倏

臨祥制俯迫忌辰音容永遠而莫追號感彌深而難抑
將欲表宅憂于中禁是宜輟聽政于外朝雖異常儀願
申罔極宜輟五月二十二日至六月二十九日朝參軍
機急切公事卽不得畱滯竝仰晝時聞奏施行宰臣文
武百官三上表以國忌廢務多日請依舊制詔報曰朕
聞禮非天降固可酌于人情事繫孝思諒無妨于國體
今以甫臨忌日暫輟視朝冀全哀戚之情用表始終之
節宰臣等累陳章表備述古今慮以萬幾之繁議以五
日之請雖茲懇切難盡允俞況保身方荷于洪基敢言
過毀而權制獲申于至性必在得中宜自今月二十九

日輟至六月七日無煩抑請深體朕懷六月戊子以滄州順化軍節度使并潞鎮定副招討使檢校太傅同平章事張萬進爲青州節度使秋九月甲辰以光祿大夫守御史大夫吳興郡開國侯姚洎爲中書侍郎平章事十二月庚午以前鄆州節度使檢校司徒食邑二千戶福王友璋爲許州節度使檢校太保是月晉王收幽州執僞燕主劉守光及其父仁恭歸晉陽

乾化四年春正月壬寅以青州節度使張萬進爲兗州節度使檢校太尉二月甲戌以感化軍節度使華商等州觀察使檢校太傅同平章事太原郡開國公康懷英

爲大安尹充永平軍節度使大安金棣等州觀察處置使夏四月丁丑以守司空平章事于兢爲工部侍郎尋貶萊州司馬以其挾私與軍校遷改故也是日以行營左先鋒馬軍使濮州刺史王彥章爲澶州刺史充行營先鋒步軍都指揮使加光祿大夫檢校太保封開國伯以永平軍節度使檢校太傅同平章事劉鄩爲開封尹遙領鎮南軍節度使五月癸丑朔方軍畱後檢校司徒韓洙起復授朔方軍節度使檢校太保秋七月晉王率師自黃澤嶺東下寇邢洛魏博節度使楊師厚軍于漳水之東晉將曹進金來奔晉軍遂退九月徐州節度使

王殷反時朝廷以福王友璋鎮徐方殷不受代乃下詔
削奪殷在身官爵仍令卻還本姓蔣便委友璋及天平
軍節度使牛存節開封尹劉鄩等進軍攻討是時蔣殷
求救于淮南楊溥遣大將朱瑾率衆來援存節等逆擊
敗之

貞明元年春牛存節劉鄩拔徐州逆賊蔣殷舉族自燔
而死于火中得其尸梟首以獻詔福王友璋赴鎮閏二
月甲午延州節度使太原西面招討應接使檢校太師
兼中書令渤海郡王高萬興進封渤海王三月辛酉朔
以天平軍節度副大使知節度事兼淮南西北面行營

招討應接等使檢校太傅同平章事牛存節爲檢校太尉加食邑一千戶賞平徐之功也丁卯以右僕射兼門下侍郎同平章事監修國史判度支趙光逢爲太子太保致仕魏博節度使楊師厚薨輟視朝三日初師厚握強兵據重鎮每邀朝廷姑息及薨輟視朝三日或者以爲天意租庸使趙巖租庸判官邵贊獻議于帝曰魏博六州精兵數萬蠹害唐室百有餘年羅紹威前恭後倨太祖每深含怒太祖尸未屬纊師厚卽肆陰謀蓋以地廣兵強得肆其志不如分割使如身使臂卽無不從也陛下不以此時制之寧知後之人不爲楊師厚耶若分

割相魏爲兩鎮則朝廷無北顧之患矣帝曰善卽以平
盧軍節度使賀德倫爲天雄軍節度使遣劉鄩率兵六
萬屯河朔詔曰分疆裂土雖賞勳勞建節屯師亦從機
便比者魏博一鎮巡屬六州爲河朔之大藩實國家之
巨鎮所分憂寄允謂重難將叶事機須期通濟但緣鎮
定賊境最爲魏博親鄰其次相衛兩州皆控澤潞山口
兩道竝連于晉土分頭常寇于魏封旣須日有戰爭未
若俱分節制免勞兵力因奔命于兩途稍泰人心俾安
居于終日其相州宜建節度爲昭德軍以澶衛兩州爲
屬郡以張筠爲相州節度使己丑魏博軍亂囚節度使

賀德倫是時朝廷旣分魏博六州爲兩鎮命劉鄩統大軍屯于南樂以討王鎔爲名遣澶州刺史行營先鋒步軍都指揮使王彥章領龍驤五百騎先入于魏州屯于金波亭詔以魏州軍兵之半隸于相州并徙其家焉又遣主者檢察魏之帑廩旣而德倫促諸軍上路姻族辭決哭聲盈巷其徒乃相聚而謀曰朝廷以我軍府強盛故設法殘破況我六州歷代藩府軍門父子姻族相連未嘗遠出河門離親去族一旦遷于外郡生不如死三月二十九日夜魏軍乃作亂放火大掠首攻龍驤軍王彥章斬關而遁遲明殺德倫親軍五百餘人于牙城執

德倫置之樓上有効節軍校張彥者最爲麤暴膽氣伏

人乃率無賴輩數百止其剽掠是日魏之士庶被屠戮

者不可勝紀帝聞之遣使齎詔安撫

通鑑夏四月帝遣供奉官扈異撫諭

魏軍仍許張彥除郡厚賜將士優賞彥等不遜投詔于地

侮罵詔使因迫德倫飛奏請卻復相衛抽退劉鄩軍帝

復遣諭曰制置已定不可改易如是者三彥等奮臂南

向而罵曰傭保兒敢如是也復迫德倫列其事時有文

吏司空頰者甚有筆才彥召見謂曰爲我更草一狀詞

宜抵突如更敢違則渡河擄之乃奏曰臣累拜封章上

聞天聽在軍衆無非共切何朝廷皆以爲閒半月三軍

切切而戈矛未息一城生聚皇皇而控告無門惟希俯鑒丹衷苟從衆欲須垂聖允斷在不疑如或四向取謀但慮六州俱失言非意外事在目前張彥又以楊師厚先兼招討使請朝廷依例授之故復逼德倫奏曰臣當道兵甲素精貔貅極銳下視并汾之敵平吞鎮定之人特乞委臣招討之權試臣湯火之節苟無顯效任賜明誅詔報曰魏博寇敵接連封疆懸遠凡于應赴須在師徒是以別建節旄各令捍禦并鎮則委魏博控制澤潞則遣相衛枝梧咸逐便安貴均勞逸已定不移之制宜從畫一之規至于征伐事權亦無定例且臨清王領鎮

之日羅紹威守藩以來所領事銜本無招討祇自楊師厚先除陝滑二帥皆以招討兼權因茲帶過鄴中原本不曾落下苟循事體寧恠施行況今劉鄩指鎮定出征康懷英往邠岐進討祇令統率師旅亦無招討使銜切宜徧諭羣情勿興浮議倚注之意卿宜體之詔至張彥壞裂抵之于地謂德倫曰梁主不達時機聽人穿鼻城中擾攘未有所依我甲兵雖多須資勢援河東晉王統兵十萬匡復唐朝世與大梁仇讎若與我同力事無不濟請相公改圖以求多福德倫不得已而從之乃遣牙將曹廷隱奉書求援于太原彥使德倫告諭軍城曰可

依河東稱天祐十三年此後如有人將文字于河南往來便仰所在處置是月邠州畱後李保衡以城歸順保衡楊崇本養子也崇本乃李茂貞養子任邠州二十餘年去歲爲其子彥魯所毒彥魯領知州事五十餘日保衡殺彥魯送款于帝卽以保衡爲華州節度使以河陽畱後霍彥威爲邠州節度使五月晉王率師赴魏州節度使牛存節薨是月鳳翔李茂貞遣僞署涇州節度使劉知俊率師攻邠州以李保衡歸順故也自是凡攻圍十四月節度使霍彥威諸軍都指揮使黃貴堅守捍寇會救軍至岐人乃退六月庚寅晉王入魏州以賀德倫

爲大同軍節度使舉族遷于晉陽是月晉人陷德州秋

七月又陷澶州刺史王彥章棄城來奔

通鑑晉人夜襲澶州刺史王彥

章在劉鄩營晉人獲其妻子

是月劉鄩自洹水潛師由黃澤路西趨

晉陽至樂平縣值霖雨積旬乃班師還次宗城遂至貝州軍于堂邑遇晉軍轉鬪數十里晉軍稍退翼日鄩移軍于莘八月賀瓌收復澶州九月以行營先鋒步軍都指揮使行澶州刺史檢校太保王彥章爲汝州防禦使依前行營先鋒步軍都指揮使壬午正衙命使冊德妃張氏是夕妃薨冬十月辛亥康王友孜謀反伏誅是夕帝于寢殿熟寐忽聞御榻上寶劍有聲帝遽起視之而

友孜之黨已入于宮中帝揮之獲免

清異錄末帝夜于寢間擒刺客乃康

王友孜所遣帝自戮之造雲母匣貯所用劍名匣曰護聖將軍之館

王子葬德妃張氏十

一月乙丑改乾化五年爲貞明元年十二月乙未詔升

華原縣爲崇州靜勝軍以美原縣爲裕州以爲屬郡以
僞命義勝軍節度使鼎耀等州觀察使特進檢校太保
同平章事李彥韜爲特進檢校太傅同平章事充靜勝
軍節度使崇裕等州觀察使河內郡開國侯仍復本姓
溫名昭圖昭圖華原賊帥也李茂貞以爲養子以華原
爲耀州美原爲鼎州僞命昭圖爲節度使至是歸款故
有是命

貞明二年春正月庚申以皇伯父宋州節度使開府儀

同三司檢校太師兼中書令廣王全昱爲守中書令餘

如故

通鑑二年春正月宣武節度使守中書令廣德靖王全昱卒

以浙江東道營田

副使檢校太傅前常州刺史杜建徽遙領涇州節度使

二月丙申右僕射門下侍郎平章事諸道鹽鐵轉運等

使楊涉罷相守左僕射涉累上章以疾辭位故有是命

是月命許州節度使王檀河陽節度使謝彥章汝州防

禦使王彥章率師自陰地關抵晉陽急攻其壘不克而

還三月劉鄩率師與晉王大戰于故元城鄩軍敗績先

是鄩駐于莘帝以河朔危急師老于外餉饋不充遣使

賜鄆詔微有責讓鄆奏以寇勢方盛未可輕動帝又問鄆決勝之策鄆奏曰但人給糧十斛盡則破敵帝不悅復遣促戰鄆召諸將會議諸將欲戰鄆默然一日引軍攻鎮定之營彼衆大駭上下騰亂俘斬甚衆時帝遣偏將楊延直領軍萬餘人屯澶州以應鄆既而晉王詐言歸太原劉鄆以爲信是月召楊延直會于魏城下鄆自莘率軍亦至與延直會既而晉王自貝州至鄆引軍漸退至故元城西與晉人決戰大爲其所敗追襲至河上軍士赴水死者甚衆鄆自黎陽濟河奔滑州已巳制以鄆爲滑州宣義軍節度副大使知節度事晉人攻衛州

陷之又陷惠州夏四月乙酉朔威武軍節度使守太傅兼中書令閩王王審知賜號忠勤保安興國功臣餘如故晉人陷洛州癸卯夜捉生都將李霸作亂龍驤都將杜晏球討平之時遣捉生軍千人戍楊劉軍出宋門外是夜由水門復入二鼓大譟火發燭城李霸與其徒燔建國門不克龍驤都將杜晏球屯鞠場聞亂兵至率騎擊之亂軍退走馬登建國門晏球奏曰亂者惟李霸一軍但守宮城遲明臣必破之未明晏球誅霸及其同惡京師方定是月以行營先鋒步軍都指揮使汝州防禦使王彥章爲鄭州防禦使依前先鋒步軍都指揮使五

月晉軍還太原六月晉人急攻邢州帝遣捉生都將張
溫率步騎五百人入于邢州至內黃溫率衆降于晉人
秋七月甲寅朔晉王自太原至魏州節度使張筠棄城
奔京師邢州節度使閻寶以城降于晉王壬戌以淮南
鎮海鎮東等軍節度使充淮南宣潤等道西面行營都
統開府儀同三司尚父守尚書令吳越王錢鏐爲諸道
兵馬元帥餘如故以左僕射楊涉爲太子太傅致仕八
月丁酉以開府儀同三司太子太保致仕趙光逢爲司
空兼門下侍郎平章事宏文館大學士延資庫使充諸
道鹽鐵轉運使九月晉王還太原滄州節度使戴恩遠

棄城來奔晉人陷貝州

歐陽史本紀二年九月晉人克貝州守將張源德死之又死事

傳略云太祖時源德自金吾衛將軍爲蔡州刺史貞明元年魏博節度使楊師厚卒末帝分魏相等六州爲兩鎮遣劉鄩將兵萬人屯于魏魏軍叛降晉源德爲鄩守貝州晉王入魏諸將欲先擊貝州晉王曰貝城小而堅攻之難卒下乃先襲破德州然後以兵五千攻源德源德堅守不下晉軍壅而圍之已而劉鄩大敗于故元城南走黎陽六鎮數十州之地皆歸晉獨貝一州圍之踰年不可下源德守既堅而貝人聞晉已盡有河北城中食且盡乃勸源德出降源德不從遂見殺

已卯天平軍節度副大使知節度

事檢校太師兼中書令琅琊郡王王檀薨八月丁酉以

開府儀同三司中書侍郎兼吏部尚書同平章事集賢

殿大學士判戶部敬翔爲右僕射兼門下侍郎平章事

監修國史判度支以光祿大夫中書侍郎同平章事鄭

珏爲特進兼刑部尚書平章事集賢殿大學士判戶部
十月晉王自太原至魏州是月前昭義軍節度使檢校
太師兼侍中陳畱郡王葛從周薨是歲河北諸州悉入
于晉

舊五代史卷八攷證

梁末帝紀上末帝諱瑱 案瑱原本訛瑱今從歐陽史

改正

太祖第四子也 案歐陽史作第三子五代會要與是書同蓋并假子博王友文而數之也

以帝爲左天興軍使 案原本脫使字今據歐陽史增入

帝乃遣人告趙巖袁象先傅暉朱珪等 案原本脫暉字今據通鑑增入

近雪家讐 案原本脫家字今據冊府元龜增入

濮陽郡開國侯袁象先 濮陽原本作博陽今據象先

本傳改正

師厚自弓高渡逼滄州張萬進懼 滄州原本作涼州

攷歐陽史劉守光傳張萬進乃滄州守將今改正

滄州順化軍節度使張萬進為青州節度使 案順化

原本作順俟今據通鑑注滄州為順化軍改正又青州通鑑作平盧攷後文是時賀德倫為平盧節度使當從此書作青州為是

寇邢洛 邢原本作鄜今據五代春秋七月來侵邢州

改正

貞明元年春牛存節劉鄩拔徐州 案徐州之拔是書
本紀及蔣殷傳俱不書月五代春秋及歐陽史俱作
正月通鑑作二月通鑑攷異又作乾化四年十一月
未詳孰是

判度支趙光逢 逢原本作遂今據唐書列傳改正
既須日有戰爭 案原本脫戰爭二字今據冊府元龜
增入

王彥章爲汝州防禦使 汝州原本作許州今據通鑑
改正

康王友弼謀反 案友弼通鑑作友敬與是書異

十一月乙丑改乾化五年爲貞明元年 案通鑑攷異
引吳越備史作正月壬辰朔改元大赦歐陽史五代
春秋俱從是書

舊五代史卷八攷證

舊五代史卷九

宋門下侍郎參知政事監修國史薛居正等撰

梁書第九

末帝紀中

貞明三年春正月戊午以前淄州刺史高允奇爲右羽
林統軍癸亥以前天平軍馬步軍都指揮使檢校太保
朱勅爲懷州刺史癸酉以右天武軍使石釗爲密州刺
史戊寅以前懷州刺史李建爲安州刺史仍賜名知節
己卯以宣義軍節度副大使知節度事北面行營副招
討等使特進檢校太傅霍彥威爲天平軍節度副大使

知節度事二月甲申晉王攻我黎陽劉鄩拒之而退乙酉前蔡州刺史董璋權知宣義軍軍州事丁亥以前右羽林軍統軍梁繼業爲左衛上將軍壬辰以租庸判官檢校司徒張紹珪爲光祿卿依前充租庸判官癸巳以權知平盧軍軍州事客省使知銀臺事元湘爲檢校司空甲午以飛龍使婁繼英爲左武衛大將軍三月庚申以前平戎軍使檢校司徒郭紹賓爲禧州刺史辛酉以前天平軍節度副使裴彥爲隨州刺史戊寅湖州刺史錢傳璟蘇州刺史錢傳璟鎮海軍節度副使錢傳瓘溫州刺史錢傳璘睦州刺史錢傳琇寶州刺史錢傳瓘明

州刺史錢傳球義州刺史錢傳季蜂州刺史錢傳珣巒

州刺史錢傳琰鎮海軍都知兵馬使錢傳璠等凡一十

一人竝加官勳階爵從吳越王錢鏐之請也夏四月庚

辰以前行左武衛大將軍蔡敬思爲右武衛上將軍辛

巳以前安州刺史劉玘權知晉州軍州事以前密州刺

史張實爲潁州刺史充本州團練使癸未以六軍押衙

充左天武軍使劉彥珪爲澶州刺史辛卯以右千牛衛

大將軍劉璩充契丹宣諭使詔諸道兵馬元帥開幕除

吏一同天策上將府故事辛丑以清海軍元從都押衙

隴州刺史吳鏐爲檢校司空癸卯以兩浙衙內先鋒指

揮使守峰州刺史錢傳珦爲泗州刺史六月庚辰以前
東京馬步都指揮使兼左天武軍使雷景從爲汝州刺
史充本州防禦使辛卯以租庸判官光祿大夫檢校司
徒行光祿卿張紹珪爲申州刺史壬辰以權知晉州建
寧軍軍州事前安州刺史劉玘爲建寧軍節度觀察畱
後秋七月丁巳以淄州刺史陳洪爲棣州刺史乙丑以
刑部員外郎封翹爲翰林學士丙寅以汝州刺史楊延
直爲左衛大將軍以前左衛上將軍劉重霸爲起復雲
麾將軍右驍衛上將軍庚午以六軍諸衛副使起復雲
麾將軍檢校太保張業爲淄州刺史八月辛巳以左神

武軍統軍周武爲寧州刺史以左崇安指揮使前申州
刺史劉仁鐸爲行州刺史戊子泰寧軍節度使張萬進
賜名守進九月庚申以遙領常州刺史張昌孫遙領壽
州刺史充本州團練使冬十月壬午以權西面行營都
監左武衛上將軍張筠權知商州軍州事戊子詔曰太
子太傅李戡多因釋教誑惑羣情此後不得出入無恆
癸巳以前崇德軍使張思綰爲左武衛上將軍己亥以
啓聖匡運同德功臣諸道兵馬元帥淮南鎮海鎮東等
軍節度使充淮南宣潤等四面行營都統開府儀同三
司尚書令吳越王錢鏐爲天下兵馬元帥壬寅以尚書

左丞吳藹爲工部尚書充兩浙官告使是月晉王自魏州還太原閏十月丁卯以前商州刺史徐璠爲左驍衛上將軍充西都大內皇牆使十一月壬午以中書侍郎平章事鄭珽權判戶部事戊子以寧州刺史周武爲武靜軍防禦使守慶州刺史以河潼軍使竇廷琬爲寧州刺史十二月晉王自太原復至魏州庚申以左金吾衛大將軍充街使華溫琪爲右龍虎軍統軍以右龍虎軍統軍張彥勳爲商州刺史以前西京大內皇牆使李項爲右威衛上將軍以左金吾衛上將軍李周彝權兼左街使壬戌以守太尉兼中書令河南尹判六軍諸衛事

魏王張宗奭爲天下兵馬副元帥丙寅以西面行營馬軍都指揮使檢校太保鄭州刺史充本州防禦使王彥章爲檢校太傅丁卯以西面行營馬步都指揮使左龍虎軍統軍賀瓌爲檢校太傅同中書門下平章事充宣義軍節度使鄭滑濮等州觀察處置等使

通鑑云時論平慶州功故

賀瓌進秩

己巳帝幸洛陽爲來年有事于南郊也遂幸伊闕

親拜宣陵時租庸使趙巖勸帝郊天且言帝王受命須行此禮願陛下力行之宰臣敬翔奏曰國家自劉鄩失律以來府藏殫竭箕斂百姓供軍不暇郊祀之禮頒行賞賚所謂取虛名而受實弊也況晉人壓境車駕未可

輕動帝不聽遂行是月晉人陷楊劉城帝聞之懼遂停

郊禮車駕急歸東京

通鑑云道路訛言晉軍已入大梁扼汜水矣從官皆憂其家相顧涕

泣帝惶駭失圖遂罷郊祀

癸酉詔文武兩班除元隨駕人數外其餘

竝令御史司憲張袞部署候車駕離京後一兩日發赴東京甲戌以天下兵馬副元帥太尉兼中書令河南尹魏王張宗奭爲西都留守

貞明四年春正月晉人寇鄆濮之境車駕至自洛陽庚辰以蔡州刺史姚勅權知感化軍節度觀察畱後乙酉以前靜難軍馬步軍都指揮使黃貴爲蔡州刺史甲午以右領軍衛上將軍齊奉國爲左金吾衛大將軍充衛

使二月遣將謝彥章帥衆數萬追楊劉城甲子晉王來
援楊劉城彥章之軍不利而退三月壬午以前右武衛
上將軍張筠爲左衛上將軍癸巳以鎮國軍節度押衙
充本道馬步軍都指揮使江可復爲行州刺史壬寅鎮
海鎮東等軍節度行軍司馬秦州節度使檢校太傅同
平章事馬綽加檢校太尉同平章事依前鎮海鎮東等
軍節度行軍司馬餘如故從錢鏐之請也夏四月丁未
以宣徽院使右衛上將軍趙穀權知青州軍州事以宣
徽院副使韋堅權知本院事己酉以銀青光祿大夫行
中書侍郎同中書門下平章事權判戶部鄭珪爲金紫

光祿大夫中書侍郎兼刑部尚書平章事集賢殿大學士判戶部上柱國仍進封滎陽郡開國侯加食邑五百戶以金紫光祿大夫行尚書吏部侍郎上柱國蘭陵縣開國男食邑三百戶蕭頊爲中書門下平章事仍進封蘭陵縣開國伯加食邑四百戶庚戌以前崇德軍使前右武衛大將軍杜存爲右領軍衛上將軍甲寅以刑部郎中充史館修撰竇專爲翰林學士初學士竇夢徵草錢鏐麻貶蓬萊尉帝召專入翰林遣崇政使李振問宰相云專是宰臣蕭頊女婿令中書商量可否中書奏曰宰相親情不居清顯避嫌之道雖著舊規若蒙特恩亦

有近例固不妨事帝乃可之己未靈武節度使韓洙落
起復授開府儀同三司依前檢校太傅同平章事癸亥
以延州忠義軍節度使太原西面招討應接使檢校太
師兼中書令渤海王高萬興兼鄜延兩道都制置使餘
如故時萬興弟鄜州節度使萬金卒故有是命己巳以
開府儀同三司守司空兼門下侍郎同平章事趙光逢
爲司徒致仕兼加食邑五百戶以光逢累上章請老故
也辛未詔宰臣敬翔權判諸道鹽鐵使務壬申以太子
賓客趙光胤爲吏部侍郎五月甲戌以荆南衙內馬步
軍都指揮使檢校司徒高從誨領濠州刺史乙亥以特

進檢校太傅前潁州團練使張實爲起復雲麾將軍依
前潁州團練使庚辰以工部尚書致仕孔拯爲國子祭
酒己丑以太常少卿韋彖爲右諫議大夫六月甲辰以
金紫光祿大夫檢校司徒歙州刺史朱令德爲忠武軍
節度觀察畱後己酉以權知感化軍兩使畱後特進檢
校太保姚勅爲感化軍節度觀察畱後庚戌上以秘書
少監王翹爲將作監以其父名秘故也丙辰以左監門
衛將軍康贊美爲商州刺史以左衛上將軍張筠爲權
知永平軍節度觀察畱後兼判大安府事戊午以前景
州刺史衛審符爲右衛大將軍庚申以河陽節度充北

面行營排陣兩京馬軍都軍節度等使光祿大夫檢校
太保謝彥章爲匡國軍節度陳許蔡等州觀察處置等
使以宣徽院副使韋堅權知河陽軍州事秋七月庚辰
以商州刺史康贊美爲起復雲麾將軍依前商州刺史
辛卯以前左驍衛上將軍楊詔爲右武衛上將軍戊戌
以前匡國軍節度使檢校尚書左僕射羅周敬爲檢校
司空守殿中監駙馬都尉八月丙午以右廣勝軍使劉
君鐸爲虢州刺史戊申以武寧軍節度副使李存權知
宿州事辛亥涇原節度使杜建徽加檢校太傅同平章
事建徽吳越王錢鏐之將也遙領涇原節制至是以其

上請加恩故有是命乙卯以蔡州刺史黃貴爲絳州刺史辛酉以絳州刺史尹皓爲感化軍節度觀察畱後癸亥以前永平軍節度副使張正己爲房州刺史乙丑以宿州團練使趙麓權知河陽節度觀察畱後以左驍衛將軍劉去非爲郢州刺史戊辰以權知永平軍節度觀察畱後兼判大安府事張筠爲永平軍節度觀察畱後依前兼判大安府事是月晉王率師次楊劉口遂軍于麻家渡北面招討使賀瓌以兵屯濮州北行臺村對壘百餘日晉王以輕騎來覘許州節度使謝彥章發伏兵掩擊圍之數重會救軍至晉王僅以身免九月丁丑靜

勝軍節度崇裕等州觀察處置等使特進檢校太傅同
平章事溫昭圖加檢校太尉甲午崇政院副使張希逸
加金紫光祿大夫行秘書少監乙未起復雲麾將軍檢
校太保壽州團練使張昌孫落起復授光祿大夫檢校
太傅冬十月辛丑朔以前感化軍節度觀察畱後特進
檢校太保姚勅爲左龍虎統軍充西都內外馬步軍都
指揮使以洛苑使金紫光祿大夫檢校司徒守左威衛
大將軍董璋爲右龍虎統軍己酉以安南靜海節度使
檢校司徒曲美爲檢校太保同平章事庚戌以商州刺
史康贊美爲蔡州刺史十一月壬辰前懷州刺史朱勅

授起復雲麾將軍依前懷州刺史十二月庚子朔晉王
領軍迫行臺寨距寨十里結營而止北面招討使賀瓌
殺許州節度使謝彥章濮州刺史孟審澄別將侯溫裕
等于軍以謀叛聞爲行營馬步都虞候朱珪構之也晉
王聞之喜曰彼將帥不和亾無日矣丁未以行營諸軍
馬步都虞候光祿大夫檢校太保曹州刺史朱珪爲檢
校太傅充匡國軍節度觀察畱後依前行營諸軍馬步
都虞候癸丑詔曰行營諸軍馬步都虞候匡國軍節度
觀察畱後朱珪昨以寇戎未滅兵革方嚴所期朝夕之
間克弭烟塵之患每于將帥別注憂勞而謝彥章孟審

澄侯溫裕忽構異圖將萌逆節賴朱珪挺施貞節密運
沈機果致梟擒免資讐敵特加異殊之命用旌忠孝之
謀便委雄藩俾荷隆渥可檢校太傅充平盧軍節度淄
青登萊等州觀察處置押新羅渤海兩番等使兼行營
諸軍馬步軍副都指揮使仍進封沛國郡開國侯乙巳
起復雲麾將軍檢校太保陳州刺史惠王友能鎮國軍
節度陝虢等州觀察處置等使起復雲麾將軍檢校太
保邵王友誨竝落起復加檢校太傅以前房州刺史牛
知業爲右羽林軍統軍癸亥北面招討使賀瓌率大軍
與晉人戰于胡柳陂晉人敗績是日旣晡復爲晉人所

敗初晉人起軍將襲東京乃下令軍中老弱悉歸于鄴
是月二十二日晉王次臨濮賀瓌王彥章自行臺寨率
軍躡之二十四日至胡柳陂晉王領軍出戰瓌軍已成
列晉王以騎突之王彥章一軍先敗彥章走濮陽晉人
輜重在陣西瓌領軍薄之晉人大奔自相蹈籍死者不
可勝紀晉大將周德威歿于陣瓌軍乃登土山列陣于
山之下晉王領兵復來戰瓌軍遂敗翼日晉人攻濮陽
陷之京師戒嚴

貞明五年春正月晉人城德勝夾河爲柵二月乙巳以
宣徽院副使韋堅權知徐州軍事二月己卯以華州威

化軍畱後尹皓爲華州節度使加檢校太保同平章事
癸未制削奪兗州節度使張守進在身官爵以其叛故
也仍命劉鄩爲兗州管內安撫制置使領兵以攻之夏
四月壬寅以永平軍畱後兼判大安府事張筠爲永平
軍節度使檢校太保行大安尹庚戌以鎮海軍北面水
陸都指揮使湖州刺史檢校太傅錢傳璟遙領宣州寧
國軍節度使加同平章事是月賀瓌攻德勝南城以艨
艟戰艦橫于河以扼津濟之路晉人斷其艨艟濟軍以
援南城瓌等退軍五月己巳山南東道節度使檢校太
傅孔勅加同平章事丁亥以延州節度使鄜延兩道都

制置太原西面招討應接等使渤海郡王高萬興爲檢校太師兼中書令充保大忠義等軍節度鄜延管內觀察等使是月以行營諸軍左廂馬軍都指揮使鄭州防禦使王彥章爲許州匡國軍節度觀察畱後依前行營諸軍左廂馬軍都指揮使六月壬戌以天驥院使李隨權知登州軍州事秋七月晉王自魏州還太原八月乙未朔滑州節度使賀瓌卒輟視朝三日詔贈侍中是月命開封尹王瓚爲北面行營招討使瓚乃與許州畱後王彥章等率大軍自黎陽濟營于楊村造浮梁以通津路九月丙寅制削奪廣州節度使南平王劉巖在身官

爵以其將謀僭號故也仍詔天下兵馬元帥錢鏐指揮
攻討冬十月晉王復至魏州是月劉鄩攻下兗州擒張
守進夷其族十一月丁丑以兗州安撫制置使特進檢
校太傅大彭郡開國公劉鄩爲兗州節度使開府儀同
三司檢校太尉同平章事賞平兗之功也辛卯王瓚帥
師至戚城遇晉軍交綏而退十二月戊戌晉王顧軍迫
河南寨王瓚率師禦之獲晉將石家才旣而瓚軍不利
瓚退保楊村寨晉人陷濮陽

舊五代史卷九

舊五代史卷九攷證

梁末帝紀中以宣義軍節度副大使知節度事 案原

本脫副字攷新唐書百官志及五代會要副大使爲
藩鎮官爵今增入

蘇州刺史錢傳璿 傳璿原本作傳珽今據十國春秋

改正

峰州刺史錢傳珣 案歐陽史職方志有封州而無峰
州是書前後俱作峰州未知何據今仍其舊

以刑部員外郎封翹 翹原本訛作堯今據封舜卿傳

改正

靈武節度使韓洙 韓洙原本作韓殊攷是書韓遜傳

洙卽遜之子歐陽史雜傳亦作洙今改正

檢校尚書左僕射羅周敬 周敬原本作用敬攷是書

晉列傳作周敬歐陽史羅紹威傳亦作子周敬今改

正

建徽吳越王錢鏐之將也 建徽原本訛作達徽今據

十國春秋改正

賀瓌殺許州節度使謝彥章 案通鑑賀瓌密譖謝彥

章于帝因與朱珪伏甲以殺彥章蓋密奉帝旨也是

書及歐陽史五代春秋俱以賀瓌專殺爲文未知孰

是

制削奪兗州節度使張守進在身官爵仍命劉鄩領兵
攻之 案是書守進歸晉本紀繫于五年三月張萬
進傳作四年七月劉鄩傳仍作五年蓋守進潛附于
晉在四年秋聲罪致討則五年春事也五代春秋以
守進叛爲五年事歐陽史又以劉鄩討之爲四年事
不如是書之徵實

舊五代史卷九攷證

舊五代史卷十

宋門下侍郎參知政事監修國史薛居正等撰

梁書第十

末帝紀下

貞明六年春正月戊子以曹州刺史朱漢賓爲安州宣威軍節度使以許州匡國軍節度觀察畱後充散指揮都軍使檢校太傅王彥章爲匡國軍節度使進封開國侯軍職如故二月癸丑宣州節度使錢傳璟起復依前檢校太傅同平章事宣州節度使以其丁內艱故也三月丁亥以前申州刺史張紹珪爲大理卿夏四月丁亥

制曰王者愛育萬方慈養百姓恨不驅之仁壽撫以淳
和而炎黃有戰伐之師堯舜有干戈之用諒不獲已其
猶病諸然則去害除妖興兵動衆殺黑龍而濟中土刑
白馬而誓諸侯終能永逸暫勞以至同文共軌古今無
異方冊具存朕以眇末之身託億兆之上四海未乂八
年于茲業業兢兢日慎一日雖踰山越海肅慎方來而
召雨徵風蚩尤尙在顧茲殘孽勞我大邦將士久于戰
征黎庶疲于力役木牛暫息則師人有乏爨之憂流馬
盡行則丁壯有無聊之苦況青春告謝朱夏已臨妨我
農時迫我戎事永言大計思致小康宜覃在宥之恩稍

示殷憂之旨用兵之地賦役實煩不有蠲除何使存濟
除兩京已放免外應宋亳潁鄆齊魏滑鄭濮沂密青登
萊淄陳許均房襄鄧沁隨陝華雍晉絳懷汝商等三十
二州應欠貞明四年終已前夏秋兩稅并鄆齊滑濮襄
晉輝等七州兼欠貞明四年已前營田課利物色等並
委租庸使逐州據其名額數目矜放所在官吏不得淹
停制命徵督下民致恩澤不及于鄉閭租稅虛捐于帳
籍其有私放遠年債負生利過倍自違格條所在州縣
不在更與徵理之限兗州城內自張守進違背朝廷結
連蕃寇久勞攻討頗困生靈言念傷殘尋加給復應天

下見禁罪人如犯大辟合抵極刑者宜示好生特令減死除準格律常赦不原外徒流已下遞減一等除降官未經量移者與量移已量移者便與復資云庚子宗正卿朱守素上言請依前朝置匭院令諫議大夫專判從之乃以右諫議大夫鄭韜光充知匭使乙巳以右僕射兼門下侍郎同平章事監修國史判度支開國公敬翔爲宏文館大學士延資庫使諸道鹽鐵轉運等使餘如故以中書侍郎兼刑部尚書平章事集賢殿大學士判戶部事鄭珏爲監修國史判度支以中書侍郎平章事蕭頊爲集賢殿大學士判戶部事以尚書左丞李琪爲

中書侍郎平章事丙午吏部侍郎趙光允爲尙書左丞
已酉以河中護國軍節度副大使知節度事制置度支
解縣池場等使開府儀同三司守太保兼中書令冀王
友謙依前守太保兼中書令兼同州節度使餘如故癸
丑鄜延節度使兼西面招討接應等使檢校太保兼中
書令渤海郡王高萬興進封延安王賜號匡時定節功
臣前衡州長史劉騰進所撰地理手鏡十卷己未以租
庸判官尙書工部郎中張銳爲戶部郎中充崇政院學
士辛酉以前吏部侍郎盧協爲禮部侍郎五月乙丑故
左衛上將軍齊奉國贈太傅詔曰應文武朝官或有替

罷多年漂流在外者宜令中書門下量才除授勿使栖
遲或有進士策名累年未釋褐者與初任一官已釋褐
者依前資敘用乙酉升宋州爲大都督府其餘廢大都
督府額六月遣兗州節度使劉鄩華州節度使尹皓崇
州節度使溫昭圖莊宅使段凝領軍攻同州先是河中
朱友謙襲陷同州節度使程全暉單騎奔京師友謙以
其子令德爲同州畱後表求節旄不允旣而帝慮友謙
怨望遂命兼鎮同州制命將下而友謙已叛遣使求援
于晉故命將討之九月庚寅以供奉官郎公遠充契丹
歡好使晉王遣都將李嗣昭李存審王建及率師來援

同州戰于城下我師敗績諸將以餘衆退保華州羅文
寨冬十月陳州妖賊母乙董乙伏誅陳州里俗之人喜
習左道依浮屠氏之教自立一宗號曰上乘不食葷茹
誘化庸民揉雜淫穢宵聚晝散州縣因循遂致滋蔓時
刺史惠王友能恃戚潘之寵動多不法故姦慝之徒望
風影附母乙數輩漸及千人攻掠鄉社長吏不能詰是
歲秋其衆益盛南通淮夷朝廷累發州兵討捕反爲賊
所敗陳頴蔡三州大被其毒羣賊乃立母乙爲天子其
餘豪首各有樹置至是發禁軍及數郡兵合勢追擊賊
潰生擒母乙等首領八十餘人械送闕下並斬于都市

龍德元年春正月癸巳詔諸道入奏判官宜令御史臺
點檢合從正衙退後便于中書門下公參辭謝如有違
越具名銜聞奏應面賜章服仍令閤門使取本官狀申
中書門下受敕牒後方可結入新銜甲辰以河東道行
營西面應接使前靜勝軍節度崇裕等州觀察處置等
使特進檢校太尉同平章事溫昭圖爲匡國軍節度陳
許蔡等州觀察處置等使以北面行營副招討使匡國
軍節度陳許蔡等州觀察處置等使光祿大夫檢校太
傅王彥章爲宣義軍節度副大使知節度事鄭滑濮等
州觀察處置等使依前北面副招討使二月己未以權

知靜勝軍節度觀察留後前汝州防禦使華溫琪爲靜
勝軍節度觀察留後依前檢校太傅丙寅以荆南節度
使檢校太師兼中書令渤海郡王高季昌爲守中書令
依前荆南節度使庚午以晉州建寧軍節度觀察留後
劉玘爲晉州節度使檢校太保壬申史館上言伏見北
齊文士魏收著後魏書于時自魏太武之初至于北齊
書不獲就乃大徵百官家傳刊總斟酌隨條甄舉搜訪
遺亡數年之間勒爲一代典籍編在北史固非虛言臣
今請明下制敕內外百官及前資士子帝戚勲家並各
納家傳具述父祖事行源流及才術德業灼然可攷者

並纂述送史館如記得前朝會昌已後公私亦任抄錄
送官皆須直書不用文藻兼以兵火之後簡牘罕存應
內外臣寮曾有奏行公事關涉制置或討論沿革或章
疏文詞有可採者並許編錄送納候史館修撰之日攷
其所上公事與中書門下文案事相符會或格言正辭
詢訪不謬者並與編載所冀忠臣名士共流家國之耿
光孝子順孫獲記祖先之不烈而且周德見乎殷紀舜
典存乎禹功非惟十世可知庶成一朝大典臣叨庸委
任獲領監修將贖素餐輒千元覽詔從之鹽鐵轉運使
敬翔奏請于雍州河陽徐州三處重置場院稅茶從之

己卯禮部尙書充西都副留守兼判尙書省事崔沂奏
西京都省凡有公事奏聞常須借印施行伏請鑄尙書
省分司印一面從之是月鎮州大將王德明殺其帥王
鎔自稱畱後遣使來求援宰臣敬翔請許之租庸使趙
巖等以爲不可乃止三月丁亥朔祠部員外郎李樞上
言請禁天下私度僧尼及不許妄求師號紫衣如願出
家受戒者皆須赴闕比試藝業施行願歸俗者一聽自
便詔曰兩都左右街賜紫衣及師號僧委功德使具名
聞奏今後有關方得奏薦仍須道行精至夏臘高深方
得補填每遇明聖節兩街各許官壇度七人諸道如要

度僧亦仰就京官壇仍令祠部給牒今後只兩街置僧
錄道錄僧正並廢己丑以前兵部郎中杜光弼爲左諫
議大夫致仕壬寅改襄州鄆縣爲沿夏縣亳州焦夷縣
爲夷父縣密州漢諸縣爲膠源縣從中書舍人馬縞請
也夏四月陳州刺史惠王友能反舉兵向闕帝命將出
師逆擊敗之友能走保陳州詔張漢傑率兵進討敕開
封府太康襄邑雍部三縣遭陳州賊軍奔衝其夏稅只
據見苗輸納五月丙戌朔制曰朕聞惟辟動天惟聖時
憲故君爲善則降之以福爲不善則降之以災朕以眇
末之身託于王公之上不能荷先帝艱難之運所以致

蒼生塗炭之危兵革薦興災害仍集內省厥咎蓋由朕躬故北有邊裔狡逞之師西有蒲同亂常之旅連年戰伐積歲轉輸虔劉我士民侵據我郡邑師無宿飽之饋家無擔石之儲而又水潦爲災蟲蝗作沴戒譴作于上怨咨聞于下而況骨肉之內竊弄干戈畿甸之中輒爲陵暴但責躬而罪已敢怨天以尤人蓋朕無德以事上穹無功以及兆庶不便于時者未能去有益于民者未能行處事昧于酌中發令乖于至當招致災患引翼禍殃罪在朕躬不能自赦夙夜是懼寢食靡寧將勵己以息災爰布澤而從欲今以薰風方扇旭日初昇朔旣視

于正陽歷宜更于嘉號庶惟新之令敷華夏以同歡期
克念之心與皇王而合道其貞明七年宜改爲龍德元
年應天下見禁罪人除大辟罪外遞減一等德音到後
三日內疏理訖奏應欠貞明三年四年諸色殘欠五年
六年夏稅殘稅並放侍衛親軍及諸道行營將士等第
頒賜優當已從別敕處分左降官與量移已經量移者
與復資長流人各移近地已經移者許歸鄉里前資朝
官寄寓遠方仰長吏津置赴闕內外文武常參官節度
使畱後刺史父母亡歿者並與封贈公私債負納利及
一倍已上者不得利上生利先經陣歿將校各與追贈

云以宣和庫使守右領衛將軍李嚴權知兗州軍州事
丁亥詔曰郊禋大禮舊有渥恩御殿改元比無賞給今
則不循舊例別示特恩其行營將士賞賚已給付本家
宜令招討使霍彥威副招討使王彥章陳州行營都指
揮張漢傑曉示諸軍知委是月兗州節度使充河東道
行營都招討使劉鄩卒六月己亥以都檢點諸司法物
使檢校司徒行左驍衛大將軍李肅爲右威衛上將軍
秋七月陳州朱友能降庚子詔曰朕君臨四海子育兆
民惟持不黨之心庶叶無私之運其有齒予戚屬雖深
敦敘之情于我國經難固含宏之旨須遵常憲以示至

公特進檢校太傅使持節陳州刺史兼御史大夫上柱國食邑三千戶惠王友能列爵爲王頒條治郡受元戎之寄任處千里之封疆就進官資已登崇貴時加錫賚以表優隆宜切知恩合思盡節撫俗當申于仁政佐時期効于忠規而狎彼小人納其邪說忽稱兵而向闕敢越境以殘民侵犯郊畿驚撓輦轂遠邇咸嫉謀畫交陳及興問罪之師旋驗知非之狀瀝懇繼陳于章表束身願赴于闕庭備述艱危覬加寬恕朕得不自爲屈已姑務安仁特施貸法之恩蓋舉議親之律詢于事體抑有朝章止行退責之文用塞衆多之論可降封房陵侯於

戲君臣之體彼有不恭伯仲之恩予垂立愛顧茲輕典
豈稱羣情凡在臣寮當體朕意甲辰制以特進檢校太
傅衡王友諒可封嗣廣王冬十月北面招討使戴思遠
攻德勝寨之北城晉王來援思遠敗于戚城

龍德二年春正月戴思遠率師襲魏州時晉王方攻鎮
州故思遠乘虛以襲之陷成安思遠遂急攻德勝北城
晉將李存審極力拒守二月晉王以兵至思遠收軍而
退復保楊村八月段凝張朗攻衛州下之獲刺史李存
儒以獻戴思遠又下淇門共城新鄉等三縣自是澶州
之西相州之南皆爲梁有晉人失軍儲三分之一焉

龍德三年春三月晉潞州節度留後李繼韜遣使以城歸順先是繼韜父嗣昭爲潞州節度使戰歿于鎮州城下晉王欲以嗣昭長子繼儔襲父位繼韜在潞州卽執繼儔囚之遣使來送款仍以二幼子爲質澤州刺史裴約不從繼韜之謀帝命董璋爲澤州刺史令將兵攻之夏四月己巳晉王卽唐帝位于魏州改天祐二十年爲同光元年閏月壬寅唐軍襲鄆州陷之巡檢使陳州刺史劉遂嚴本州都指揮使燕顥奔歸京師皆斬于都市五月以滑州節度使王彥章爲北面行營招討使辛酉王彥章率舟師自楊村寨浮河而下斷德勝之浮梁攻

南城下之殺數十人唐帝棄德勝之北城併軍保楊劉
己巳王彥章段凝圍楊劉城六月乙亥唐帝引軍援楊
劉潛軍至博州築壘于河東岸戊子王彥章杜晏球率
兵急攻博州之新壘不克遂退保于鄒口秋七月丁未
唐帝引軍沿河而南王彥章棄鄒口復至楊劉己未自
楊劉拔營退保楊村寨八月以段凝代王彥章爲北面
行營招討使戊子段凝營于王村引軍自高陵渡河復
臨河而還董璋攻澤州下之庚寅唐帝軍于胡城先鋒
將康延孝率百騎奔于唐盡洩其軍機命滑州節度使
王彥章率兵屯守鄆之東境九月戊辰彥章以衆渡汶

與唐軍遇于遞防鎮彥章不利退保中都冬十月辛未朔日有食之甲戌唐帝引師襲中都王彥章兵潰于是彥章與監軍張漢傑及趙廷隱劉嗣彬李知節康文通王山典等皆爲唐人所獲翼曰彥章死于任城帝聞中都之敗唐軍長驅將至遣張漢倫馳驛召段凝于河上漢倫墜馬傷足復限水潦不能進時禁軍尚有四千人朱珪請以拒唐軍帝不從登建國門召開封尹王瓚謂之曰段凝未至社稷繫卿方畧瓚卽驅軍民登城爲備或勸帝西奔洛陽趙巖曰勢已如是一下此樓誰心可保乃止俄報曰晉軍過曹州矣帝置傳國寶于臥內俄

失其所在已爲左右所竊迎唐帝矣帝召控鶴都將皇甫麟謂之曰吾與晉人世讎不可俟彼刀鋸卿可盡我命無令落讎人之手麟不忍帝曰卿不忍將賣我耶麟舉刀將自剄帝持之因相對大慟戊寅夕麟進刃于建國樓之廊下帝崩

五代會要末帝年三十六

麟卽時自剄遲明唐軍

攻封邱門王瓚迎降唐帝入宮妃郭氏號泣迎拜初許

州獻綠毛龜宮中造室以蓄之命曰龜堂帝嘗市珠手

市旣而日珠數足矣衆皆以爲不祥之言帝末年改名

瑱字一十一月一八日

案此句疑有脫衍蓋當時傳會者析王字爲一十一析真

字爲十月一八也冊府元龜作或解云瑱字一十一十一月一八知此句日字因下文有日字而衍今姑仍其舊

果以一十一年至十月九日亡唐帝初入東京聞帝殂
憮然歎曰敵惠敵怨不在後嗣朕與梁主十年對壘恨
不生見其面尋詔河南尹張全義收葬之其首藏于太
社晉天福二年五月詔太社先藏唐朝罪人首級許親
屬及舊寮收葬時右衛上將軍婁繼英請之會繼英得
罪乃詔左衛上將軍安崇阮收葬焉

史臣曰末帝仁而無武明不照奸上無積德之基可乘
下有弄權之臣爲輔卒使勁敵奄至大運俄終雖天命
之有歸亦人謀之所誤也惜哉

舊五代史卷十攷證

梁末帝紀下宣州節度使錢傳璟 宣州原本訛作巨

州今據十國春秋改正

應宋亳潁鄆齊魏滑 案原本脫魏字今據冊府元龜

增入

充知甌使 知甌原本作知匱攷通典唐三省官有知

甌使今改正

朱友謙襲陷同州節度使程全暉單騎奔京師 案歐

陽史本紀朱友謙殺節度使程全暉至列傳亦言全

暉奔京師紀傳互異宜以是書爲正

華溫琪爲靜勝軍留後 案通鑑作貞明六年事與是
書繫龍德元年異

鎮州大將王德明殺其帥王鎔 案五代春秋三月趙
人張文禮弒其君鎔是書及通鑑作二月

夏四月陳州刺史惠王友能反 案歐陽史作三月與
是書異

詔張漢傑率兵進討 漢傑原本作衡傑今據通鑑改
正

王彥章率舟師自楊村寨浮河而下 舟師原本訛州
師今據通鑑改正

帝召控鶴都將皇甫麟 案通鑑攷異引莊宗實錄作
皇甫麟歐陽史從是書作麟

舊五代史卷十攷證